

Pol ndê bapia têŋ lau Rom-ŋga

Yom whê bapia dindec sa-ŋga

Pol to bapia dindec têŋ lau sêkêŋ whiŋ-ŋga naŋ sêndöc malac atu Rom. Inj to têŋ ndoc inj mbo malac Korin, ma kêŋ têŋ awhê danj ŋaâ Pibi (16:2) bu kôc sa ndi ma kêŋ têŋ lau malac Rom-ŋga. Pol tac whiŋ bu ndic lau Rom-ŋga kêsi, ma inj to bapia dindec munj, bu whê mêtê naŋ inj gêm, naŋ ŋahu sa.

Lau ŋatô gauc gêm bu Pol to 1:18-32 hêganôŋ lau gameŋ apa-ŋga, ma inj to 2:1-29 hêganôŋ inj dau ndê lau Israel-ŋga. Inj tôt yêc awê bu yac lau hoŋ dakôm sac, ma tu yac neŋ sac-ŋga, dec yac hoŋ dawêkaiŋ seŋ dambac ndu-ŋga. Magoc Anötö kêmasaŋ lêŋ bu suc lau nom-ŋga si sac kwi, ma asa naŋ bu kêŋ whiŋ gêŋ atu naŋ Yisu Kilisi kôm tu yac-ŋga, naŋ Anötö sam inj bu ŋamalac gitêŋ.

Ma Pol bu whê sa bu Anötö sam yac bu lau gitêŋ ŋambwa dom, magoc inj kêŋ Njalau Dabuŋ têŋ yac tu bu kôm yac dati lau wakuc naŋ daŋan wambu Anötö, ma dasa neŋ lêŋ gitêŋ ti dabuŋ. Bocdinan Pol to yom pi lêŋ ŋayham tu dasa-ŋga, ma dapinj dauŋ dôŋ ma dahu mêtê sac siŋ. Yêc lôcwha (sapta) 9-11 Pol tôt asê bu inj ŋalôm ŋawapac pi inj dau ndê lau Israel-ŋga naŋ sêkêŋ whiŋ dom, ma inj tac whiŋ ŋandô bu sêkêŋ whiŋ Yisu.

Pol gic hu ndê yom têŋ lau Rom-ŋga

¹ Aö Pol, Yisu Kilisi ndê ɳgac akiŋ, gato bapia dindec. Anötö kêgalêm aö sa gati iŋ ndê ʈaposel, ma kêyalin aö sa bu wahoc iŋ ndê ɳawaê ɳayham asê. ² ɳawaê ɳayham dau Anötö kêmatiŋ tidôŋ muŋ su, ma iŋ ndê propet sêhoc asê, ma sêto sip Buku Dabunj. ³⁻⁴ Ma yom dau hêganôŋ iŋ ndê Atu Yisu Kilisi, yac neŋ Pômdau. Iŋ ti ɳamalac naŋ sa akêŋ Kinj Dawid ndê toŋ. Ma tiŋambu Anötö uŋ iŋ sa akêŋ lau batê-ŋga ɳa Nalau Dabuŋ ndê ɳaclai, dec tōc asê tiawê bu iŋ Anötö Atu. ⁵ Ma Yisu Kilisi dau kêyalin yac sa ma kêmwasin yac bu ati aposel tu iŋ ndê ɳaê-ŋga, dec kêkiŋ yac bu aŋgalêm lau sa yêc gameŋ hoŋ bu s êkêŋ whiŋ iŋ, ma tu dinan-ŋga dec danja wambu iŋ ndê yom. ⁶ Ma galem dau têŋ mac lau Rom-ŋga bu ati Yisu Kilisi ndê lau bocdinaŋ.

⁷ Aö gato bapia dindec têŋ mac lau Rom-ŋga hoŋ naŋ Anötö tac whiŋ mac, ma kêgalêm mac sa ati iŋ ndê lau dabuŋ. Mwasiŋ ti yom malô têŋ mac hoŋ akêŋ Damaŋ Anötö, lu Pômdau Yisu Kilisi.

Pol gauc gêm bu ndic lau Rom-ŋga kêsi

⁸ Gêŋ ɳamata-ŋga aö wasôm têŋ mac bu tôm bêc hoŋ, aö gateŋ mbec tu Yisu Kilisi ndê ɳaê-ŋga, ma gam danje aneŋ Anötö tu mac hoŋ-ŋga. Nahu bu yêc gameŋ hoŋ lau sêŋgô mac nem akêŋ whiŋ ɳawaê. ⁹ Ma Anötö naŋ aö gam akiŋ ti aneŋ ɳalôm sambuc, ma gahoc iŋ Atu ndê ɳawaê ɳayham asê, naŋ kêyalê bu yomandô aö gauc gêm mac ɳapar, ¹⁰ têŋ têm hoŋ naŋ gateŋ mbec. Njasawa balin su, aö atac whiŋ bu wandic mac kêsi, ma kwahic dec aö gateŋ mbec têŋ Anötö bu lic aö neŋ gauc dinan ɳayham, ma lêc gatam su têŋ aö bu watêŋ mac waloc. ¹¹ Bu aö atac whiŋ ɳandô bu walic mac, tu

bu wakêj Njalau Dabuŋ ndê mwasinj ɳatô lom mac bu puc mac dôj. ¹² Ma têj ndoc yac dambo dawhiŋ dauŋ, naŋ mac nem akéj whiŋ ma aö neŋ gakêj whiŋ, oc piŋ yac hoŋ dôj bu dalhac ɳaŋga.

¹³ O asidôwai, aö atac whiŋ bu mac aŋyalê bu têm daêsam aö gauc gêm bu watêj mac waloc, magoc gêj daêsam kalhac aö ahuc e menj têj kwahic dec. Aö gam mêtê yêc lau apa si gameŋ ɳatô, ma aneŋ gweleŋ dau gêm ɳandô su. Boc-dinan aö gauc gêm bu wakôm gweleŋ kainj tigenj wawhiŋ mac e gweleŋ dau ɳandô sa yêc mac-ŋga whiŋ. ¹⁴ Gweleŋ dau gic aö ɳawaê bu wanem mêtê lau Grik ti lau naŋ lau Grik dom, ma lau ti gauc ma lau gauc mba sêwhiŋ. ¹⁵ Tu dinan-ŋga dec aö neŋ ɳalôm kac aö bu wanem mêtê mac lau Rom-ŋga awhiŋ.

Anötö ndê ɳawaê ɳayham ti ɳaclai

¹⁶ Bu aö mayaŋ tu Anötö ndê ɳawaê ɳayham-ŋga dom. Nahu bu Anötö ndê ɳaclai yêc yom dau, bu nem lau naŋ bu sêkêj whiŋ, naŋ si. Inj gic bata têj lau Israel-ŋga munj, ma têj lau naŋ lau Israel dom, naŋ tiŋambu. ¹⁷ Nawaê ɳayham dau ndê ɳaclai yêc bu nem lau si, Nahu bu ɳawaê dau tôc lêj naŋ Anötö kêj bu ɳamalac sêti lau gitêj, naŋ asê. Lêj dau lêj dakêj whiŋ-ŋga, ma ɳalêj danj mba. Tôm yom naŋ propet akwa danj to yêc bocdec bu:

Lau gitêj oc sêndöc tali tu si sêkêj whiŋ-ŋga.
[Hab 2:4]

Namalac hoŋ sêkôm giso

18 Anötö naŋ ndöc undambê, kwahic dec tōc iŋ ndê ɻalôm asê tēŋ yac.* Inj tac ɻandê tēŋ lau naŋ sêpuc dômbwê iŋ, ma sêkôm mêtê sac. Nac si mêtê sac kêgwiniŋ yom ɻandô dôŋ. **19** Gitôm bu lau nom-ŋga sêŋyalê yom ɻandô pi Anötö, bu gêŋ naŋ iŋ kôm, naŋ whê iŋ sa tiawê tēŋ ɻac su. **20** Lau danj sêlic Anötö su dom, yomandô! Tigen tēŋ ndoc iŋ kêŋ undambê ti nom e meŋ tēŋ kwahic dec, naŋ sêlic gêŋ hoŋ naŋ iŋ kêŋ. Ma gêŋ dau whê iŋ ndê ɻahu sa ma tōc iŋ ndê ɻaclai atu naŋ yêc titêm-titêm, naŋ asê tiawê. Tu dinaŋ-ŋga dec ɻamalac danj oc tôm dom bu pa dau ma sôm bu iŋ gêm gauc Anötö. **21** Lau nom-ŋga sêŋyalê bu Anötö dê mbo, magoc sêtoc iŋ sa ti ɻac si Anötö, ma sem danje iŋ tu gêŋ dan-ŋga dom. Nac sêhê gauc pi yom ɻambwa-ɻambwa daêsam e ɻasec kôm ɻac si ɻalôm ahuc. **22** Nac sêtoc dau sa bu ɻac lau ti gauc, magoc ɻac lau gauc mbasi. **23** Nac sêtec bu sênen akiŋ Anötö naŋ mbo titêm-titêm, magoc sem akiŋ gêŋ naŋ gic waê bu ninga. Nac sêhu Anötö ti ndê ɻawasi atu siŋ, ma sem akiŋ gwam naŋ ɻac dau sêmasaŋ sem ɻamalac aŋgô, mbac aŋgô, bôc aŋgô, ma mboc aŋgô.

24 Tu dinaŋ-ŋga dec Anötö hu ɻac siŋ bu sêkôm mêtê ɻalôm ɻagalac-ŋga tôm si atac whiŋ. Ma sêkôm mêtê ɻadômbwi pi dau ɻamlic gitôm gêŋ ɻambwa-ŋga. **25** Nac sêpuc dômbwê Anötö ndê yom ɻandô, ma yom tasaj gêm ɻac si ɻalôm ahuc. Nac sêtec bu sênen akiŋ Anötö naŋ kêŋ gêŋ hoŋ, ma sêhu iŋ siŋ

* **1:18:** Têŋ ndoc Yisu mbac ndu pi a gicso dau, naŋ tōc asê bu Anötö tac ɻandê tu ɻamalac si sac-ŋga. Magoc tu Yisu hôc ɻandê dau ô lau nom-ŋga su, dec tōc asê bu iŋ tac whiŋ lau nom-ŋga hoŋ ma tec bu danj ninga. Alic Rom 2:4; 3:26; 8:3; ma Jon 3:16.

ma sem akinj gêj naŋ iŋ kêŋ. Magoc iŋ gêj hoŋ ηadau, ma ηayham bu yac tampinj iŋ tôm bêc hoŋ. Yomandô!

26 Tu ηamalac si giso-ŋga, dec Anötö hu ηac siŋ bu sêkôm gêj mayan-ŋga tôm ηac si ηalôm ηagalac kêgilí ηac. Ηac si lauwhê sêhu lauwhê ti ηgac si lêŋ solop sêmbo sêwhinj daun-ŋga siŋ, ma sêsa lêŋ so. **27** Ma ηalêŋ tigenj lauŋgac sêhu lauwhê ti ηgac si lêŋ solop siŋ ma mêtê atac ηagalac pi dandi-ŋga gêm ηac ahuc sambuc. Lauŋgac sêkôm mêtê mayan-ŋga sêwhinj lauŋgac, ma tu dinan-ŋga sêtap ηagêyô naŋ gic mêtê sac kainj dinanj ηawaê, naŋ sa yêc dau si ηamlic.

28 Ηamalac sêlic ηayham bu s êpuc dômbwê Anötö, ma tu dinan-ŋga iŋ hu ηac siŋ e ηac si gauc timboloc, ma sêkôm mêtê naŋ gic ηamalac ηawaê dom. **29** Mêtê sac tidau-tidau gêm ηac si ηalôm ahuc. Ηac sêkôm mêtê gitôm mêtê wec ma mêtê mayan-ŋga, ηac tagatu gêj, ηac sêlic lau ηatô sac, sic ηamalac ndu, sêŋgalôm lau, sêkôm gêj daêsam bu sêtim lau ma sêrsau ηac, ma sêsec lau. **30** Ηac sêngôlinj yom pi lau, atac tec Anötö, ma sêpu lau ηatô. Sêpo dau ti sêtoc dau sa, sêkôc gauc pi lêŋ sac ηapanj, ma ηac dangapêc ηawahô têŋ dinda ti dambai. **31** Ηac lau gauc mbasi-ŋga, ma yom bocke naŋ sêşôm, naŋ sêkôm ηandô sa dom. Ηac lau ηalôm ηadandi-ŋga naŋ atac tec lau ma tawalô ηac dom. **32** Lau sac dau sêŋyalê bu Anötö sôm tidôŋ su bu lau naŋ sêkôm mêtê sac kainj bocdinaŋ, oc sêmbac ndu. Tigenj ηac sêkôm sac sêsiŋ su ej. Ma gêj danj whinj bocdec bu, lau ηatô naŋ sêkôm mêtê sac tôm ηac dau sêkôm, naŋ sêlic ηac ηayham.

2

Anötö ndê lêj êmatôc lau-ŋga

¹⁻³ Yac taŋyalê bu têj ndoc Anötö êmatôc lau naŋ sêkôm sac kaiŋ dinaŋ, dec iŋ oc êmatôc ŋac êŋkuc yom ŋandô pi ŋac. Bocdinan dec am asa naŋ kêgôlinj yom pi lau ŋatô, ma sam ŋac bu lau sêkôm sac-ŋga, naŋ êmyalê bu am kêgôlinj yom pi daôm whiŋ, bu am ŋamalac kôm sac-ŋga whiŋ. Ma am oc tôm dom bu êmasaŋ yom têj Anötö tu daôm nem sac-ŋga ma lhö su iŋ ndê matôc. ⁴ Am ŋô su naŋ! Anötö tawalô yac ndu andô, dec kôc ndê ŋjalôm dôŋ ma kêmatoč yac ŋagahô dom. Am gêlic iŋ ndê lêj dinaŋ bu gêŋ ŋambwa, a? Bocke? Am kêyalê dom bu Anötö kôm gêŋ dinaŋ tu bu kêŋ ŋasawa têj yac bu danem dauŋ kwi-ŋga, a? ⁵ Magoc am nem ŋjalôm ŋadandi ma am tec bu nem daôm kwi. Tu dinaŋ-ŋga am daôm gic Anötö ndê atac ŋandê sa tu daôm-ŋga, ma oc yêc tôm bêc ŋambu-ŋga naŋ Anötö dau oc tôc iŋ ndê matôc gitêŋ ma iŋ ndê atac ŋandê asê. ⁶ Têj bêc dinaŋ, iŋ oc kêŋ ŋagêyô têj lau hoŋ êŋkuc ŋac tigeŋ-tigeŋ si mêtê. ⁷ Lau naŋ sêsap mêtê ŋayham dôŋ ŋapanj ma takwê bu sêtap Anötö ndê mwasiŋ sêndöc tali ŋapanj-ŋga ma ŋawasi ti waê atu sa, naŋ Anötö oc kêŋ ŋac sêndöc tali ŋapanj. ⁸ Magoc lau naŋ sêkôm gêŋ hoŋ tu sêpo dau sa-ŋga, ma sêtec yom ŋandô ma sêsap mêtê sac dôŋ, naŋ oc sêtap Anötö ndê atac ŋandê sa. ⁹⁻¹⁰ Aêc! Lau hoŋ naŋ sêkôm mêtê sac, naŋ oc sêtap ŋawapac ti ŋasac sa. Tigeŋ lau naŋ sêkôm mêtê ŋayham, naŋ oc sêtap ŋawasi ti waê ŋayham ma yom malô sa. Oc ŋandô sa pi lau Israel-ŋga sêmuŋ, goc lau naŋ lau Israel dom, naŋ sêŋkuc. ¹¹ Bu têj ndoc Anötö oc êŋsahê lau pi ŋac

si mêtê, naŋ iŋ oc toc lau toŋ daŋ sa hôc gêlêc lau toŋ daŋ dom. ¹² Bu lau hoŋ naŋ sêkôm sac, naŋ oc sêtap Anötö ndê matôc sa. Lau naŋ lau Israel-ŋga dom, naŋ sêkôc Moses ndê yomsu sa dom, naŋ oc sêtap matôc sa tu yomsu-ŋga dom, ŋac dau si giso oc tiŋ ŋac su. Ma lau Israel-ŋga naŋ sêkôc Moses ndê yomsu sa, ma sêkôm mêtê sac, naŋ oc sêtap Anötö ndê matôc sa êŋkuc yomsu dau. ¹³ Bu Anötö oc sam ŋamalac daŋ bu ŋamalac gitêŋ tu iŋ ŋgô yomsu-ŋga ŋambwa lec dom. Tigeŋ ŋamalac naŋ sôc yomsu dau ŋapu ma daŋga wambu ŋapep eŋ, naŋ Anötö oc sam iŋ bu ŋamalac gitêŋ.*

¹⁴ Magoc lau naŋ lau Israel dom, naŋ sêkôc Anötö ndê yomsu sa dom, naŋ ŋalêŋ bocke? Ŋac bu sêkôm mêtê ŋayham naŋ tôm yomsu whê sa, dec tôt asê bu ŋac dau si yomsu yêc bocdinaŋ. ¹⁵ Ma tôt asê bu lêŋ gitêŋ tôm yomsu whê sa têŋ yac, naŋ yêc ŋac si ŋalôm. Ma ŋac dau sêtôm bu sêŋsahê si lêŋ ma sêŋyalê yêc ŋac si ŋalôm, mêtê bocke naŋ sêkôm solop, ma mêtê bocke naŋ sêkôm so. ¹⁶ Yom hoŋ dindéc ŋahu oc tiawê têŋ bêc naŋ Anötö oc kêŋ Yisu Kilisi êŋsahê lau hoŋ, êŋkuc ŋac si yom naŋ yêc siŋ dau yêc ŋac si ŋalôm. Ŋawaê ŋayham naŋ aö gahoc asê, naŋ whê gêŋ hoŋ dinaŋ sa.

Lau Israel-ŋga ma Moses ndê yomsu

¹⁷ Mac lau naŋ ambo gameŋ bocke, ma asam daôm bu lau Israel-ŋga, aŋgô su naŋ. Mac gauc gêm bu Anötö oc kôc mac sa tu mac akôc Moses ndê yomsu su-ŋga, a? Mac atoc daôm sa bu mac

* **2:13:** Tiŋambu Pol tôt asê tiawê bu ŋamalac daŋ oc tôm dom bu êŋkuc yomsu hoŋ timala e Anötö lic iŋ bu ŋamalac gitêŋ - alic Rom 3:20, 23.

ati Anötö ndê lau, a? ¹⁸ Bocke? Mac aŋyalê lêj naŋ Anötö tac whinj, ma gauc gêm bu mac ahôc gêlêc lau ɻatô tu mac aŋyalê yomsu-ŋga, a? ¹⁹⁻²⁰ Mac gauc gêm bu yomsu whê mac nem gauc sa pi yom ɻandô, dec tac whinj bu andôhôj lau wakuc ti lau gauc mba, a? Mac bu awê lau naŋ tandô pec, me alic daôm gitôm ya ɻawê bu pô lau naŋ sêmbo ɻasec ɻalôm, a? ²¹ Mac andôhôj lau ɻatô, ma bocke dec andôhôj daôm dom? Mac am mêtê lau bu sênen kaŋ gêj dom. Mac daôm akôm, me mba? ²² Mac asôm têj lau bu sêkôm mêtê mockaiŋ-ŋga dom, ma mac daôm? Mac atac tec gwam, magoc têm ɻatô mac asôc lôm naŋ lau sem akiŋ gwam sêmbo, ma am kaŋ gêj, me mba? ²³ Mac atoc daôm sa tu akôc yomsu su-ŋga, magoc têj ndoc mac aŋgilì yomsu, dec mac akôm Anötö ndê waê tisac. ²⁴ Tôm yom naŋ sêto yêc, naŋ sôm:

Lau gameŋ apa-ŋga sêpu Anötö ndê ɻaê tu mac nem lêj sac-ŋga. [Ais 52:5]

²⁵ Am ɻgac naŋ sêse am nem ɻamlic ɻatô su kêkuc lau Israel-ŋga si ɬpwac, naŋ ɻô. Am bu danjam wambu yomsu hoŋ, dec gêj naŋ sêkôm têj am ɻamlic, naŋ gêj ti ɻahu ɻayham. Magoc am bu êmgilì yomsu, dec gêj naŋ sêkôm têj am, oc nditôm gêj ɻambwa. Yêc Anötö aŋgô-ŋga am oc tôm ɻgac ɬgameŋ apa-ŋga naŋ sêse in ɻamlic ɻatô su dom. ²⁶ Ma lau naŋ sêse ɻac si ɻamlic ɻatô su dom, magoc sêkôm mêtê ɻayham tôm yomsu whê sa, naŋ Anötö oc lic ɻac gitôm lau naŋ sêse ɻac si ɻamlic ɻatô su. ²⁷ Ma ɻgac naŋ sêse in dom, magoc kôm gêj naŋ kêkuc yomsu, naŋ oc puc am nem giso asê. ɻahu bu am daôm kôc yomsu su, ma kêkuc pwac sêse ɻamlic-

ŋga, magoc am ŋgac êŋgilì yomsu-ŋga.

²⁸ Lau si ŋahu sêti lau Israel-ŋga ŋandô sip gêŋ ŋamlic-ŋga dom. Ma pwac sêsê ŋamlic-ŋga naŋ ŋahu andô hêganôŋ gêŋ naŋ sêkôm têŋ ŋamlic, naŋ dom.

²⁹ Mba! Lau naŋ sêmasaŋ si ŋalôm ŋapep yêc Anötö aŋgô-ŋga, naŋ sêti lau Israel-ŋga ŋandô. Ma pwac sêsê ŋamlic-ŋga ŋa-ŋahu andô, naŋ yomsu naŋ sêto sip bapia, naŋ oc tôm dom bu kôm ŋandô sa. Magoc gweleŋ naŋ Nalau kôm mbo ŋamalac si ŋalôm, naŋ kôm pwac dau ŋa-ŋahu andô ŋandô sa. Ŋamalac kaiŋ dinaj hêgo dau bu tap ndê waê sa yêc lau nom-ŋga dom, tigeŋ in tap waê sa yêc Anötö dau.

3

Mêtê sac oc tôm dom bu nem ŋandô ŋayham

¹ Bocdinaŋ lau Israel-ŋga sêtap mwasiŋ bocke sa tu sêti lau Israel-ŋga, naŋ hôc gêlêc lau ŋatô si mwasiŋ su? Ma ŋac si pwac sêsê ŋamlic ŋatô su-ŋga oc nem ŋac sa ŋaleŋ bocke? ² Aŋgô! Lau Israel-ŋga sêtap mwasiŋ tidau-tidau sa. Gêŋ ŋamata-ŋga ŋac lau dau dinaj Anötö kêŋ in ndê yom sip ŋac apai amba.

³ Magoc lau Israel-ŋga ŋatô bu sêkêŋ whiŋ Anötö dom, dec mac gauc gêm bocke? Tu ŋac si sêkêŋ whiŋ dom-ŋga, dec Anötö oc hu yom naŋ in gic bata su, naŋ siŋ, me? ⁴ Mba andô! Tôm bu ŋamalac hoŋ sêti lau sêŋsau tasaj-ŋga, magoc Anötö oc tôm dom bu seŋ yom daŋ naŋ in kêmatinj tidôŋ, naŋ su. Tôm yom naŋ sêto yêc, naŋ sôm:

Yom hoŋ naŋ am sôm, naŋ oc sêlic bu yom ŋandô enj.

Ma lau bu sêŋsahê am, dec oc tôm dom bu sêtap am nem giso daŋ sa. *[BW 51:4]*

⁵ Lau ɳatô gauc gêm gauc ɳambwa ma sêṣôm yom bocdec bu, “Yac neŋ lêŋ sac-ŋga tōc Anötö ndê lêŋ gitêŋ asê yêc awê, dec tu sake-ŋga iŋ atac ɳandê têŋ yac? Iŋ bu kêŋ ɳagêyô têŋ yac, dec oc solop dom.” ⁶ Gauc dinaŋ iŋ so sambuc! Bu bocdinaŋ, goc Anötö oc êmatôc lau nom-ŋga ɳalêŋ nde? ⁷ Ma lau ɳatô sêṣôm, “Aneŋ yom tasaŋ tōc Anötö ndê yom ɳandô asê tiawê e lau sêhoc iŋ ndê waê asê ɳapanj. Bocdinaŋ tu sake-ŋga iŋ gêlic aö gitôm ɳgac sac daŋ ma kic aneŋ yom bu watap matôc sa?” ⁸ Oyaê, aŋgô su naŋ! Yom bu bocdinaŋ, dec gitôm bu dasôm, “Yac dakôm sac tu bu sac nem ɳandô ɳayham-ŋga.” Magoc bocdinaŋ dom. Lau ɳatô sêŋsau ma sêŋgôlin yom pi yac lau aposel ma sêṣôm bu yom ɳalhô dinaŋ sa yac whaŋsuŋ. Oc sêtap ɳagêyô sac sa tu ɳac si yom tasaŋ dinaŋ-ŋga.

Namalac gitêŋ daŋ mbo dom

⁹ Bocke, yac lau Israel-ŋga mba lêŋ naŋ asa ambo Anötö aŋgô-ŋga, naŋ hôc gêlêc lau ɳatô si su, me? Mba andô! Tôm yac asôm su bocdec bu, lau Israel-ŋga ma lau apa hoŋ sêmbo sac ɳa-ɳaclai ɳapu. ¹⁰ Tôm yom naŋ sêto yêc naŋ sôm:

Namalac gitêŋ daŋ mbo dom andô. ¹¹ Ma ɳamalac daŋ kêyalê Anötö, me kôm mwâsac tu bu ti iŋ ndê gêŋ-ŋga lec dom. ¹² Lau hoŋ sêpuc dômbwê Anötö e sêti gêŋ ɳapopoc-ŋga. Namalac gitêŋ daŋ mbo dom. Mba andô! [BW 14:1-3; 53:1-3; Ekl 7:20]

¹³ ɳac si whasun sac sambuc, gitôm gêŋ batê naŋ sêŋsuŋ si dom, ma ɳasu pôm gameŋ kwi. Ma ɳac lau sêṣôm yom tasaŋ-ŋga. Yom naŋ sa ɳac

tôkwa, naŋ gitôm mboc ñamalic sac. [BW 5:9;
140:3]

14 Nac sêpucbo lau ñawahô, ma yom ñamakic gêm
 ñac si whasun ahuc. [BW 10:7]

15 Nac lau hôp-hôp tu sêkêc dac siŋ-ŋga. **16** Ma
 gameŋ bocke naŋ sêmbo, naŋ sêkôm tisac ma
 sêkêŋ ñawapac têŋ lau. **17** Nac sêŋyalê lêŋ yom
 malô-ŋga dom. [Ais 59:7-8]

18 Ma ñac sêtöc Anötö daŋ dom. [BW 36:1]

19 Yac tanjyalê bu Moses ndê yomsu hoŋ hêganôŋ
 lau naŋ sêmbo yomsu dau ñapu. Tu dinaŋ-ŋga lau
 hoŋ si yom mba, ma ñac hoŋ sic waê bu sêtap Anötö
 ndê matôc sa. **20** B ocdinaŋ ñamalac daŋ mbo dom,
 naŋ tôm bu êmasaŋ yomsu sambob ñapep e Anötö
 lic iŋ bu ñamalac gitêŋ. Mba! Magoc Moses ndê
 yomsu tôc yac neŋ sac asê têŋ yac.

Yac dati lau gitêŋ tu yac neŋ dakêŋ whiŋ-ŋga

21 Kwahic dec Anötö tôc lêŋ dati lau gitêŋ-ŋga
 asê, naŋ ñahu sip yomsu dom. Moses ti lau propet
 sêto yom pi lêŋ dau muŋ su. **22** Lau hoŋ naŋ sêkêŋ
 whiŋ Yisu Kilisi, naŋ sêtap lêŋ dau sa su, ma Anötö
 gêlic ñac bu lau gitêŋ. Lêŋ tigen dinaŋ gic waê
 lau Israel-ŋga ti lau sambob. **23** Ñahu bu yac hoŋ
 yac lau dakôm sac-ŋga, ma tu yac neŋ sac-ŋga, dec
 gitôm dom bu datigasuc Anötö ti iŋ ndê ñawasi
 atu. **24** Magoc yac hoŋ datôm bu dati lau gitêŋ
 tu gweleŋ naŋ Yisu Kilisi kôm tu nem yac si-ŋga.
 Anötö kêmasaŋ lêŋ dinaŋ bu êmwasiŋ yac ñambwa
 en. **25** Iŋ kêŋ Yisu gitôm da bu hôc ñandê ô yac neŋ
 sac ñagêyô, ma dakêŋ whiŋ bu dac naŋ iŋ kêc siŋ,
 naŋ hê wamba yac su têŋ Anötö. Ñalêŋ dinaŋ iŋ
 tôc asê bu iŋ Anötö gitêŋ. Bu iŋ gêlic sac gitôm gêŋ

ηambwa dom, magoc lau naŋ sêkôm sac muŋ-ŋga, naŋ iŋ hê ɣac si yom dôŋ. Ma iŋ kôc ndê ɣalôm dôŋ ²⁶ e iŋ kêŋ lau hoŋ si sac ɣagêyô pi Yisu. Bocdinaŋ kwahic dec Anötö tôc asê bu iŋ dau iŋ gitêŋ, ma iŋ kêmasaŋ lêŋ bu sam lau naŋ sêkêŋ whiŋ Yisu, naŋ bu lau gitêŋ.

²⁷ Bocdinaŋ ɣamalac daŋ gitôm dom bu toc dau sa. Nahu bu Anötö oc lic ɣamalac daŋ bu ɣamalac gitêŋ tu lêŋ yomsu-ŋga dom, magoc tu lêŋ dakêŋ whiŋ Yisu-ŋga. ²⁸ Mêtê naŋ yac ahoc asê, naŋ sôm bu yac dati lau gitêŋ tu yac neŋ dakêŋ whiŋ-ŋga, ma tu yac neŋ sakin taŋkuc yomsu-ŋga dom. ²⁹ Bocke? Anötö iŋ lau Israel-ŋga tawasê si Anötö, me? Mba! Iŋ lau Israel-ŋga si Anötö, ma lau gameŋ apa-ŋga si Anötö bocdinaŋ. ³⁰ Bu Anötö tigeŋ dê mbo, naŋ sam lau hoŋ naŋ sêkêŋ whiŋ Yisu bu lau gitêŋ, lau naŋ sêŋkuc pwac sêsê ɣamlic ɣatô-ŋga, ma lau naŋ sêŋkuc pwac dau dom bocdinaŋ. ³¹ Magoc mac gauc gêm bocke? Yac asôm yom pi lêŋ dakêŋ whiŋ-ŋga tu bu aseŋ Moses ndê yomsu su-ŋga, me? Aö wasôm têŋ mac, mba andô! Yac apuc yomsu dau dôŋ.

4

Abraham kêŋ whiŋ Anötö dec ti ɣgac gitêŋ

¹ Gauc nem abaŋ Abraham ndê lêŋ, oc whê gêŋ sake sa têŋ yac? ² Anötö sam Abraham bu ɣgac gitêŋ tu gêŋ naŋ iŋ dau kôm-ŋga, a? Bu bocdinaŋ, dec oc tôm bu Abraham toc dau sa. Magoc Anötö gêlic iŋ ɣalêŋ bocdinaŋ dom. ³ Bu sêto yom yêc, naŋ sôm bocdec bu:

Abraham kēj whiŋ Anötö, ma tu dinaŋ-ŋga
Anötö gēlic iŋ bu ŋgac gitēŋ. [Gen 15:6]

4 Ngac naŋ kōm gweleŋ naŋ kōc iŋ ndē ŋaoli sa
tōm mwasiŋ ŋambwa dom. Iŋ tap ŋaoli dau sa tu
iŋ kōm gweleŋ-ŋga. **5** Magoc asa naŋ bu kēj whiŋ
Anötö, dec Anötö oc êmwasiŋ iŋ ŋambwa ma lic iŋ
bu ŋamalac gitēŋ. Iŋ tap mwasiŋ dau sa tu iŋ kōm
gweleŋ daŋ-ŋga dom, magoc tap sa ŋambwa tu iŋ
ndē kēj whiŋ-ŋga. Anötö dau kēmasaŋ lēŋ bu lau
sac sēti lau gitēŋ.

6 Kiŋ Dawid sōm yom kaiŋ tigeŋ pi ŋamalac naŋ
Anötö kēmwasiŋ ma sam iŋ bu ŋamalac gitēŋ, naŋ
tap mwasiŋ dau sa ŋambwa, ma tu gweleŋ naŋ iŋ
kōm-ŋga dom. Dawid to yom ma whē ŋamalac kaiŋ
dinar ndē ŋahu atac ŋayham-Iŋga sa bocdec bu:

7 Mac lau naŋ Anötö suc mac nem sac kwi ma
hu ŋayom siŋ, naŋ atac ŋayham sa. **8** Ma am asa
naŋ Anötö suc nem giso kwi ma oc gauc nem
tiyham dom, naŋ atac ŋayham sa bocdinaŋ.
[BW 32:1-2]

9 Mac gauc gêm bocke? Yom dau gic waē lau
Israel-ŋga naŋ sēŋkuc pwac sêše ŋamlinc ŋatô su-ŋga,
naŋ tawasê, me gic waē lau naŋ sēŋkuc pwac dau
dom, naŋ sêwhiŋ? Yac asôm su, bu Anötö gēlic
Abraham bu ŋgac gitēŋ tu iŋ ndē kēj whiŋ-ŋga.
10 Bocke? Sêše Abraham ndē ŋamlinc ŋatô su, dec
Anötö gēlic iŋ bu ŋgac gitēŋ, me? Wasôm mba.
Anötö sam iŋ bu ŋgac gitēŋ muŋ su. **11** Tēŋ tēm
sêše Abraham su dom, naŋ iŋ kēj whiŋ, dec Anötö
sam iŋ bu ŋgac gitēŋ. Ma tiŋambu Anötö kēmatiŋ
pwac sêše ŋamlinc-ŋga tēŋ iŋ, gitōm dôhōŋ daŋ, bu
puc yom pi iŋ ti ŋgac gitēŋ tu kēj whiŋ-ŋga, naŋ

dôj. Bocdinan̄ Abraham in̄ ti lau gamej apa-ŋga naŋ sêse ɻac dom magoc sêkēŋ whin̄, naŋ hoŋ si damba. Ma tôm Anötö sam Abraham bu ɻgac gitêŋ, goc ɻalēŋ tigeŋ Anötö oc sam lau dau bu lau gitêŋ.
12 Ma lau Israel-ŋga naŋ sêŋkuc pwac sêse ɻamlic-ŋga, naŋ bu sêkēŋ whin̄, dec Abraham ti ɻac si damba bocdinan̄. Bu ɻac lau dau sêŋkuc Abraham ndê lêŋ kēŋ whin̄-ŋga, naŋ in̄ kékuc têŋ têm sêse in̄ su dom.

13 Anötö gêm mbec Abraham ma gic bata yom têŋ in̄ ti in̄ ndê lau wakuc, bu ɻac oc sêwêkaiŋ nom sambuc. ɻac sêtap mbec dau ɻa-ɻandô sa tu lêŋ sêkēŋ whin̄-ŋga naŋ kôm ɻac sêti lau gitêŋ yêc Anötö aŋgô-ŋga, ma tu sêŋkuc yomsu-ŋga dom.
14 Lau bu sêtap Anötö ndê mbec ɻamwasin̄ sa tu sêŋkuc yomsu-ŋga, dec lêŋ dakêŋ whin̄-ŋga gitôm gêŋ ɻambwa, ma mwasiŋ naŋ Anötö gic bata bu kêŋ têŋ Abraham, naŋ gitôm gêŋ ɻambwa bocdinan̄.
15 Nahu bu lau hoŋ naŋ sêŋgili Moses ndê yomsu ma sêkôm sac, naŋ sic waê bu oc sêtap Anötö ndê atac ɻandê sa. Yomsu bu mba, goc yom taŋgilì yomsu-ŋga mba bocdinan̄.

16 Ma bocdinan̄ lau naŋ sêkēŋ whin̄, naŋ sêtap yom naŋ Anötö gic bata têŋ Abraham, naŋ ɻa-ɻandô sa gitôm mwasiŋ ɻambwa. Ma Anötö puc yom naŋ in̄ gic bata têŋ Abraham ndê lau wakuc, naŋ dôj. In̄ puc dôj têŋ lau Israel-ŋga naŋ sêkôc in̄ ndê yomsu sa, naŋ tawasê dom, magoc puc dôj têŋ lau naŋ sêŋkuc Abraham ndê lêŋ kêŋ whin̄-ŋga sêwhin̄. Tu dinan̄-ŋga Abraham ti yac hoŋ neŋ damaŋ. **17** Tôm yom naŋ Anötö sôm têŋ Abraham, naŋ sêto yêc bocdec bu:

Aö wakôm am ti lau tonj daêsam si damba. *[Gen 17:5]*

Bocdinañ Abraham nañ kêj whinj Anötö, nañ ti yac hoñ neñ damañ yêc Anötö aŋgô-ŋga.

Ma Anötö, iñ Anötö nañ ndê ŋaclai atu yêc bu unj lau batê sa sêmbo tali tiyham, ma bu sôm yom ña awha goc gêj nañ yêc dom, nañ meñ hôc asê. ¹⁸ Abraham takwê gêj nañ lau hoñ gauc gêm bu tôm dom bu oc ŋandô sa. Ma Anötö tôc tata hoñ têj Abraham goc sôm têj iñ bu:

Am nem wakuc oc sêtôm dinañ. *[Gen 15:5]*

Abraham kêj whinj Anötö, dec kôm iñ ti lau tonj daêsam si damba. ¹⁹ Abraham kêyalê bu iñ ndê yala ti 100 su, ma iñ ndê licwalô pacndê su. Ma iñ kêyalê bu Sara ndê têm kôc balêkoc-ŋga pacndê. Tigenj iñ kôc iñ ndê kêj whinj dôj ŋan̄ga, ²⁰ ma atac lu-lu dom pi gêj nañ Anötö gic bata têj iñ. Iñ kêj whinj ŋan̄ga, ma po Anötö ndê waê sa. ²¹ Iñ kêyalê tidôj bu Anötö ndê ŋaclai yêc bu kôm gêj nañ iñ gic bata, nañ ŋandô sa. ²²⁻²³ Tu dinañ-ŋga dec sêto yom yêc bocdec bu:

Anötö gêlic iñ bu ŋgac gitêj. *[Gen 15:6]*

Yom dau sêto tu Abraham tawasê-ŋga dom. ²⁴ Sêto tu yac lau nañ dakêj whinj Anötö nañ unj yac neñ Pômdau Yisu sa yêc lau batê-ŋga. Tu yac neñ dakêj whinj-ŋga, dec Anötö oc lic yac bu lau gitêj bocdinañ. ²⁵ Anötö kêj Yisu mbac ndu tu yac neñ sac-ŋga, ma unj iñ sa tiyham dec kêmasanj lêj bu dati lau gitêj.

¹ Bocdinaŋ, tu yac neŋ dakēŋ whinŋ-ŋga, dec Anötö gêlic yac bu lau gitēŋ. Ma tu yac neŋ Pômdau Yisu Kilisi-ŋga, dec dambo Anötö aŋgô-ŋga ti atac pa su eŋ. ² Yisu gêlêc gatam su têŋ yac bu dambo Anötö ndê mwasiŋ ŋalôm, tu yac neŋ dakēŋ whinŋ-ŋga. Yac datap mwasiŋ dau sa su, ma bocdinaŋ dec dambo ti atac ŋayham tu gêŋ naŋ dakēŋ bataŋ dambo, naŋ bu oc datap Anötö ndê ŋawasi sa. ³ Ma gêŋ daŋ tiyham. ɉawapac bocke naŋ dahôc tu dakēŋ whinŋ Yisu-ŋga, naŋ dahôc ti atac ŋayham bocdinaŋ. Bu yac tanjyalê bu gêŋ wapac naŋ pi yac, naŋ gêm yac sa bu dalhac ŋaŋga. ⁴ Ma yac bu dati lau dalhac ŋaŋga-ŋga, dec tôc asê bu yac lau naŋ datôm bu dahôc gêlêc saê. Ma tu yac dahôc gêlêc saê-ŋga, dec puc yac dôŋ bu dakēŋ bataŋ gêŋ naŋ Anötö gic bata. ⁵ Ma yac neŋ dakēŋ bataŋ oc ŋandô mbasi dom, ma bocdinaŋ yac oc mayaŋ dauŋ dom. Bu yac tanjyalê Anötö ndê mêtê atac whinŋ yac-ŋga su, tu ɉalau Dabunŋ naŋ iŋ kêŋ sip yac neŋ ŋalôm-ŋga.

Yisu Kilisi hê wamba Anötö tu yac-ŋga

⁶ Têŋ têm yac tanjyalê Anötö su dom, ma licwalô mba tu danem dauŋ sa-ŋga, naŋ Anötö kêkiŋ Yisu bu mbac ndu tu yac-ŋga, tôm têm naŋ iŋ dau kêyalinŋ sa su. ⁷ Lau daŋ oc sêmbac ndu tu ɉamalac gitêŋ daŋ-ŋga dom. Me mac gauc gêm bocke? ɉamalac daŋ oc tôm bu puc dau dôŋ ma mbac ndu tu ɉamalac ŋayham daŋ-ŋga, me mba? ⁸ Tigen Kilisi mbac ndu tu yac lau dakôm sac-ŋga. Ma ŋalêŋ dinaŋ dec Anötö tôc iŋ ndê atac whinŋ yac asê.

⁹ Kwahic dec yac lau naŋ dakēŋ whinŋ Yisu, naŋ dati lau gitêŋ tu dac naŋ iŋ kêc siŋ-ŋga. Ma bocd-

inan yac tanyalê tidôj bu Yisu oc nem yac sa, têj ndoc Anötö êjsahê lau hoj-nga. Ma yac oc datap Anötö ndê atac ɻandê sa dom. ¹⁰ Muŋ-nga yac neŋ sac kôm yac dambo datôm Anötö ndê ɻacyo, magoc iŋ hê wamba yac ɻa iŋ ndê Atu ndê mbac ndu. Kwahic dec iŋ hê wamba yac su, ma iŋ ndê Atu mbo tali tiyham, dec tanyalê bu yomandô, iŋ oc nem yac si têj bêc ɻambu-nga. ¹¹ Ma gêŋ daŋ whiŋ bocdec bu. Tu yac neŋ Pômdau Yisu Kilisi hê wamba yac têj Anötö-nga, dec yac dambo ti atac ɻayham atu, tu dati Anötö ndê lau-nga.

Adam ti dambac ndu ɻahu, ma Yisu ti dandöc taŋli ɻahu

¹² Sac hôc asê nom tu ɻamalac tigeŋ-nga. Ma lêŋ dambac ndu-nga hôc asê nom tu sac-nga. Lau nom-nga hoj sêkôm sac, ma tu dinaj-nga ɻac sêmbac ndu. ¹³ Sac hôc asê nom muŋ su, ma tiŋambu Anötö kêŋ iŋ ndê yomsu têj Moses. Ma yomsu bu mba, goc ɻalêŋ mba bu Anötö hê lau si yom dôj tu sêŋgilì yomsu-nga. ¹⁴ Bocdinaj lau naŋ sêŋkuc Adam e meŋ têj têm naŋ Anötö kêŋ yomsu têj Moses, naŋ sêŋgilì Moses ndê yomsu dau ɻadan dom. Magoc Anötö gic yomsu ɻgac ɻamata-nga Adam, ma iŋ kêgilì yomsu dau. Ma lau naŋ sêŋkuc Adam, naŋ sêmbac ndu tu sêwêkaiŋ iŋ ndê sac ɻagêyô-nga. ɻgac ɻamata-nga Adam iŋ tôm dôhôj naŋ danem dôhôj whiŋ ɻgac naŋ meŋ sa kêkuc iŋ. ¹⁵ Lau daêsam sêmbac ndu tu ɻgac tigeŋ ndê sac-nga. Magoc Anötö ndê mwasiŋ naŋ kêŋ ɻambwa têj lau tu ɻgac tigeŋ Yisu Kilisi-nga, naŋ gêm lau daêsam sa kêlêc. Bocdinaj gêŋ lu dinaŋ, Anötö ndê mwasiŋ ma Adam ndê sac, naŋ sêtôm dau dom.

16 Yomandô. Anötö ndê mwasiŋ hōc gêlêc ɳgac tigeŋ ndê sac. Bu ɳgac tigeŋ ndê sac hê Anötö ndê matôc pi lau daêsam, magoc lau sac daêsam sêti lau gitêŋ tu Anötö ndê mwasiŋ-ɳga. **17** Tu ɳgac tigeŋ ndê sac-ɳga, dec ɳaclai dambac ndu-ɳga gêm gôlinj lau nom-ɳga hoŋ. Magoc tu ɳgac tigeŋ Yisu Kilisi-ɳga, lau naŋ sêtap Anötö ndê mwasiŋ sêti lau gitêŋ-ɳga sa, naŋ oc sêmbo tali ma sênem gôlinj sêwhinj inj têŋ têm ɳambu-ɳga.

18 Bocdinaj, lau hoŋ sic waê bu sêtap matôc sa tu sac tigeŋ dinaj-ɳga. Magoc lau hoŋ naŋ sêkêŋ whinj, naŋ sêti lau gitêŋ ma sêtap mwasiŋ dandöc tanjli-ɳga sa, tu gweleŋ gitêŋ tigeŋ naŋ Yisu Kilisi kôm-ɳga. **19** B u ɳgac tigeŋ dangapêc têŋ Anötö, dec lau daêsam sêti lau sêkôm sac-ɳga. Magoc ɳgac tigeŋ danja wambu Anötö, dec kêmasaŋ lêŋ bu lau daêsam oc tôm bu sêti lau gitêŋ.

20 Lau hoŋ sêwêkaiŋ Adam ndê sac ɳagêyô, magoc Anötö kêŋ ndê yomsu têŋ lau tu bu sênyalê si sac-ɳga. Magoc têŋ ndoc lau si sac kêsôwec tiatu, naŋ Anötö ndê mwasiŋ suc sac kwi-ɳga kêsôwec tiatu andô hōc gêlêc sac su. **21** Têŋ ɳamata-ɳga sac gêm gôlinj lau hoŋ ma tu dinaŋ-ɳga ɳac sêmbac ndu. Ma ɳalêŋ tigeŋ kwahic dec Anötö ndê mwasiŋ gêm gôlinj lau naŋ sêkêŋ whinj ma sêti lau gitêŋ, ma kêŋ ɳac sêndöc tali ɳapaŋ tu yac neŋ Pômdau Yisu Kilisi-ɳga.

6

Dapuc dômwêŋ sac tu Kilisi-ɳga

1 Mac gauc gêm bocke? Yac dakôm sac ɳapaŋ bu Anötö ndê mwasiŋ suc sac kwi-ɳga êŋsôwec tiatu

ηapanj, me? ² Mba andô! Yac dahu mêtê sac siŋ su, gitôm lau batê naŋ sêhu gêŋ nom-ŋga siŋ. ³ Anđô. Busanju naŋ piŋ yac dôŋ tam daminj Yisu Kilisi, naŋ piŋ yac dôŋ tam daminj inj ndê mbac ndu whiŋ. Mac anyalê yom dau, me mba? ⁴ Mac anyalê bu Yisu Kilisi mbac ndu ma sêŋsuhanj inj. Ma busanju naŋ yac daliŋ su, naŋ gitôm Anötö kêsuhuŋ yac dawhiŋ Yisu Kilisi. Ma tu dinaj-ŋga tôm Damaŋ uŋ Yisu sa akêŋ lau batê-ŋga ḥja inj ndê ḥaclai ti ḥawasi atu, dec kwahic dec inj gêlic yac gitôm lau naŋ sêtisa tiyham, ma bocdinaŋ taŋsêlêŋ ti dasa neŋ lêŋ tiwakuc.

⁵ Busanju naŋ daliŋ, naŋ piŋ yac dôŋ tam daminj Yisu ndê mbac ndu, dec tôm yac dambac ndu dawhiŋ inj. Ma piŋ yac dôŋ tam daminj inj ndê tisa akêŋ lau batê-ŋga bocdinaŋ. ⁶ Tu dinaj-ŋga dec anyalê ḥapep bu yac neŋ ḥalôm akwa sac-ŋga, naŋ Anötö gic pi a gicsó dau whiŋ Yisu, tu bu ḥalôm akwa nem gôliŋ yac dom, ma dambo datôm lau akiŋ mêtê sac-ŋga tiyham dom. ⁷ Bu yac dambac ndu dawhiŋ Kilisi su, ma asa naŋ mbac ndu su, naŋ Anötö kêgapwêc inj su yêc sac ḥa-ḥaclai.

⁸ Yac dambac ndu su dawhiŋ Kilisi, ma bocdinaŋ yac dakêŋ whiŋ bu yac oc dambo taŋli dawhiŋ inj. ⁹ Nahu bu yac tanyalê bu Anötö uŋ Kilisi sa akêŋ lau batê-ŋga, ma tu dinaj-ŋga tôm dom bu inj mbac ndu tiyham. ḥaclai dambac ndu-ŋga oc êŋgwiniŋ inj tiyham dom. ¹⁰ Bu inj mbac ndu, ma inj ndê mbac ndu tigeŋ dinaj gêmlhi lau hoŋ si sac ḥatôp. Ma kwahic dec inj mbo tali tiyham, ma mbo tali tu bu po Anötö ndê waê sa-ŋga.

¹¹ ḥalêŋ tigeŋ akôc gauc pi daôm bocdec bu, mac

ahu mêtê sac siŋ su, gitôm lau batê sêhu gêŋ nom-ŋga siŋ. Ma kwahic Anötö piŋ mac dôŋ am damiŋ Yisu Kilisi, dec mac ambo tamli awhiŋ iŋ, tu bu apo Anötö ndê waê sa-ŋga. ¹² Sac tac whiŋ bu ti nem ŋjadau, ma hê mac bu akôm mêtê sac ŋapaŋ. Bocdinanŋ ayob daôm bu sac nem gôlinŋ mac nem ŋamlieŋ ŋagêŋ daŋ dom. ¹³ Ayob tanôm ti amam ma ŋamlieŋ ŋagêŋ hoŋ bu sénem akiŋ sac dom. Magoc akêŋ daôm sambuc têŋ Anötö, atôm lau naŋ sêtisa akêŋ lau batê-ŋga ma sêmbo tali. Ma akêŋ nem ŋamlieŋ ŋagêŋ hoŋ tu anem akiŋ Anötö-ŋga, ma akôm mêtê gitêŋ eŋ. ¹⁴ Bu iŋ solop dom bu sac ti ŋjadau mac tiyham. Nahu bu mac ambo yomsu ŋapu tôm muŋ-ŋga lê dom, kwahic dec mac ambo Anötö ndê mwasiŋ ŋapu.

Dati Anötö ndê lau akiŋ lêŋ gitêŋ-ŋga

¹⁵ Mac gauc gêm bocke? Yac dambo yomsu ŋapu dom, magoc dambo Anötö ndê mwasiŋ ŋapu. Bocdinanŋ yac oc dakôm sac ŋapaŋ, a? Aö wasôm têŋ mac, mba andô! ¹⁶ Anjô su naŋ. Gêŋ bocke naŋ mac asôc ŋapu, naŋ ti nem ŋjadau. Sac bu ti nem ŋjadau, dec mac oc awêkaiŋ seŋ ambac nduŋga. Magoc mac bu akêŋ Anötö ti nem ŋjadau ma daŋam wambu iŋ, dec mac oc ati lau gitêŋ. Mac aŋyalê yom dau, me mba? ¹⁷ Muŋ-ŋga mac ati mêtê sac ndê lau akiŋ ŋambwa. Magoc danem daŋe Anötö bu kwahic dec mac akêŋ nem ŋjalôm sambuc bu daŋam wambu yom naŋ yac andôhôŋ mac, ma akôc sa su. ¹⁸ Kilisi kêgapwêc mac su yêc sac ŋaŋaclai, ma mac ac waê bu asa Anötö ndê lêŋ gitêŋ, gitôm lau akiŋ sic waê bu daŋga wambu si ŋjadaui.

19 Mac nem gauc sa pi lau sêkêj whinj-nga si lêj wakuc dom, dec aö gam dôhôj pi lau akinj ñambwa ti ñadaui nom-nga si lêj, bu wawhê sa yêc awê têj mac. Muñ-nga mac akêj nem amam ti gahim ma mac nem gêj hoñ tu sênem akinj mêtê sac ma mêtê ñadômbwi-nga. Magoc kwahic dec akêj nem gêj hoñ bu ati lau akinj nañ sêsa lêj gitêj eñ, e ati lau dabuñ. **20** Têj ndoc mac ambo atôm lau akinj mêtê sac-nga, nañ mac ac ahê lêj gitêj gacgej. **21** Muñ-nga lê mac atap ñandô ñayham bocke sa tu lêj nañ kwahic dec kêj maya mac nañ-nga? Lêj sac-nga dau nañ ña-ñandô dambac ndu goc. **22** Magoc kwahic dec Kilisi kêgapwêc mac su yêc mêtê sac, ma mac ati Anötö ndê lau akinj. Ma sakinj wakuc dindec ña-ñandô, nañ mac ati lau dabuñ ma oc andöc tamli ñapañ. **23** Bu ñaôli nañ gic waê lau nañ sêsa lêj sac-nga, nañ sêmbac ndu. Magoc mwasiñ nañ Anötö bu kêj ñambwa têj yac lau nañ dakêj whinj, nañ dandöc tañli ñapañ, tu yac neñ Pômdau Yisu Kilisi-nga.

7

Pol whê yomsu, ma Nalau Dabuñ si gôliñ sa

1 O asidôwai, mac lau nañ anyalê yomsu tidôj. Mac anyalê su bu yomsu hêganôj lau têj ndoc sêmbo tali eñ. **2** Akôc gauc pi yomsu lauwhê ti ñgac sênem dau-nga. Awhê dañ bu nem ñgac sa su, nañ goc yomsu dau sô iñlu nakweñ dôj, tôm têm nakweñ mbo tali. Magoc iñ nakweñ bu mbac ndu, goc awhê dau mbo yomsu dau ndê gôliñ ñapu tiyham dom. **3** Iñ bu nem ñgac wakuc têj têm nakweñ mbo tali dôj mbo, nañ dasam iñ bu awhê

kôm mockainj-ŋga. Magoc iŋ nakweŋ bu mbac ndu, goc yomsu sô iŋlu dôŋ-ŋga pacndê, ma iŋ bu nem ŋgac wakuc, goc dasam iŋ bu awhê mockainj-ŋga dom.

⁴ Ma ŋalêŋ tigeŋ aneŋ asidôwai, tu Anötö piŋ mac dôŋ am damiŋ Kilisi-ŋga, dec tôm mac ambac ndu su, ma ambo yomsu ndê gôliŋ ŋapu tiyham dom. Ma kwahic dec mac atap nem ŋadau wakuc sa, naŋ Anötö un iŋ sa akêŋ lau batê-ŋga. Tu dinanj-ŋga dec yac danem ŋandô ŋayham tu Anötö-ŋga dandic ŋawaâ. ⁵ Bu têŋ ndoc yac dakêŋ whinj su dom, naŋ yac neŋ ŋalôm akwa gêm gôlinj yac. Ma mêtê sac naŋ yomsu sôm bu dakôm dom, naŋ ŋalôm akwa kac yac bu dakôm. Ma mêtê dau ŋa-ŋandô naŋ dawêkainj seŋ dambac ndu-ŋga. ⁶ Magoc kwahic dec yac dambac ndu su ma dahu gêŋ naŋ sô yac dôŋ, naŋ siŋ. Kilisi kêgapwêc yac su yêc yomsu akwa naŋ sêto su yêc, ma kwahic dec tam akiŋ Anötö ma taŋkuc lêŋ wakuc naŋ Njalau Dabuŋ tôc têŋ yac.

Moses ndê yomsu tôc sac asê tiawê

⁷ Bocdinaŋ dasôm yom bocke pi yomsu? Yomsu iŋ gêŋ sac me? Mbsasi andô! Yomsu bu yêc dom, dec aö oc waŋyalê mêtê sac ŋalêŋ nde? Yomsu danj sôm bu, “Tamgatu gêŋ dom.” Ma tu dinanj-ŋga dec aö kayalê bu mêtê taŋgatu gêŋ-ŋga iŋ mêtê sac. ⁸ Magoc sac kêsalê lêŋ bu êŋgilí aneŋ ŋalôm e taŋgatu gêŋ ŋapaŋ, ma yomsu ŋayaao tôc lêŋ dau têŋ sac. Yomsu bu mba, goc sac ŋa-ŋaclai dau oc pacndê bocdinaŋ. ⁹ Muŋ-ŋga aö kayalê yomsu dom, ma gambo ŋayham ma gauc gêm sac dom.

Magoc tēñ ndoc aö kadôhôj yomsu, nañ sac ña-ñaclai tisa ti ñañga e aö kayalê bu gawêkaiñ señ wambac ndu-ñga. ¹⁰ Aö gatap sa bu yomsu hoñ nañ Anötö kêj tu bu wê lau sêsa señ sêmbo tali-ñga, nañ wê aö gasa señ wambac ndu-ñga. ¹¹ Nahu bu yomsu dau kêj ñasawa têñ sac, dec sôc meñ e ndê ñaclai tim aö, ma wê aö gasa señ wambac ndu-ñga. ¹² Bocdinaj dasôm sake? Dasôm bu yomsu dau iñ sac, a? Mba! Ñagôlinj hoñ nañ Moses to, nañ gêñ dabuñ. Ma Anötö ndê yomsu hoñ, nañ gêñ dabuñ, ma gitêñ, ma ñayham.

¹³ Mac gauc gêm bocke? Gêñ ñayham dinaj wê aö gasa señ wambac ndu-ñga? Mba andô! Magoc tu yomsu-ñga dec aö kayalê bu gakôm sac ma gawêkaiñ señ wambac ndu-ñga. Ma yomsu dau tôc asê bu mêtê sac iñ gêñ sac sambuc.

Nalôm akwa ndê lêj so Nalau Dabuñ ndê lêj

¹⁴ Yac tanyalê bu Anötö ndê yomsu iñ Nalau Dabuñ ndê gêñ. Magoc aneñ ñalôm akwa kêkuc Ñalau ndê lêj dom, dec aö gati ñgac akiñ mêtê sac-ñga. ¹⁵ Bu gêñ nañ aö gakôm, nañ kayalê dom. Mêtê nañ aö tac whiñ bu wakôm, nañ gakôm dom. Magoc mêtê nañ aö atac tec, nañ gakôm ñapanj. ¹⁶ Mêtê sac nañ gakôm, nañ yomsu dau sôm bu mêtê so. Ma tu aö dauñ atac tec mêtê sac nañ gakôm-ñga, dec galic bu yomsu iñ solop ma ñayham. ¹⁷ Bocdinaj dec aö dauñ gakôm gêñ dau dom, magoc sac nañ yêc aneñ ñalôm, dec kêgilí aö bu wakôm gêñ dau. ¹⁸ Aö kayalê bu gêñ ñayham danj yêc aneñ ñalôm akwa dom. Bu aö tac whiñ bu wakôm mêtê ñayham, magoc aö gakôm dom. ¹⁹ Bu aö gakôm mêtê nañ aö atac whiñ bu wakôm,

naŋ dom, magoc mêtê naŋ aö atac tec bu wakôm, naŋ dec aö gakôm ɻapanj. ²⁰ Ma tu gakôm gêŋ naŋ aö atac tec bu wakôm-ɻnga, goc wasôm bu aö dauŋ gakôm gêŋ dau dom, magoc sac naŋ yêc aneŋ ɻalôm, dec kêgilí aö bu wakôm gêŋ dau.

²¹ Bocdinaŋ aö gatap ɻagôliŋ bocdec sa yêc aneŋ ɻalôm. Aö bu wakôm mêtê ɻayham, magoc sac kêtî aö ahuc ɻapanj. ²² Bu yêc aneŋ gatuŋ aö galic Anötö ndê yomsu gitôm gêŋ atac whinj-ɻnga. ²³ Magoc aö kasahê bu ɻagôliŋ dau-ɻnga daŋ gêm gôliŋ yêc aneŋ ɻamlic, ma bu wê aö amanj ti gahinj ma aneŋ gêŋ hoŋ bu sêkôm sac ɻapanj. ɻagôliŋ sac-ɻnga dau gic siŋ têŋ ɻagôliŋ ɻayham naŋ aö gauc gêm bu wakôm, ma kêgwiniŋ aö dôŋ gitôm ɻgac gapocwalô-ɻnga. ²⁴⁻²⁵ Bocdinaŋ aö wasôm yom bocdec bu. Aneŋ gauc gêm bu wati ɻgac akiŋ naŋ sôc Anötö ndê yomsu ɻapu, magoc aneŋ ɻalôm akwa gêm akiŋ ɻagôliŋ sac-ɻnga ɻapanj. Oyaê, asa oc êngaho aö ɻgac sac dec su, yêc ɻalôm akwa naŋ wêkaiŋ seŋ wambac ndu-ɻnga? Magoc kwahic dec Anötö kêgaho aö su, ma tu dinan-ɻnga dec wanem daŋge inj tu yac neŋ Pômdau Yisu Kilisi-ɻnga.

8

Dambo taŋli tu Nalau Dabunj-ɻnga

¹ Bocdinaŋ dec yac lau naŋ Anötö piŋ yac dôŋ tam damiŋ Yisu Kilisi, naŋ kwahic dec taŋyalê bu yac oc datap matôc sa dom andô. ² Nahu bu Nalau gêm gôliŋ yac, ma kêŋ yac dambo taŋli tu Yisu Kilisi-ɻnga, ma kêgapwêc yac su yêc ɻaclai sac ti dambac ndu-ɻnga naŋ muŋ-ɻnga gêm gôliŋ yac. ³ Tu yac neŋ ɻalôm akwa-ɻnga, dec gitôm dom bu

tan̄kuc Anötö ndē yomsu. Ma bocdinaŋ yomsu dau gitōm dom bu kōm yac dati lau gitēŋ. Magoc Anötö kēmasaŋ lēŋ bu kōm yac dati lau gitēŋ bocdec bu. Inj kēkiŋ inj ndē Atu tigeŋ meŋ mbo nom ti ɣamalac tōm lau sac nom-ŋga. Ma kēŋ inj ti da tu yac neŋ sac-ŋga. Nalēŋ dinaj Anötö kēŋ ɣamalac hoŋ si sac ɣagēyō pi ndē Atu ma kēmatōc inj gitōm ɣamalac sac daŋ. ⁴ Inj kōm gēŋ dau, tu bu yac dasa neŋ lēŋ tan̄kuc ɣalōm akwa dom, magoc dasa neŋ lēŋ tōm Nalau Dabuŋ gēm gōliŋ yac, dec dakōm mêtē gitēŋ eŋ, tōm yomsu tōc tēŋ yac.

⁵ Lau naŋ sēsa silēŋ sēŋkuc ɣalōm akwa, naŋ gauc gēm mêtē naŋ ɣalōm akwa kōm, naŋ ɣapaŋ. Magoc lau naŋ sēsa si lēŋ tōm Nalau Dabuŋ gēm gōliŋ ɣac, naŋ gauc gēm mêtē naŋ Nalau tac whiŋ bu sēkōm, naŋ ɣapaŋ. ⁶ Namalac naŋ ndē gauc sap mêtē ɣalōm akwa-ŋga dōŋ ɣapaŋ, naŋ gacgeŋ mbo seŋ mbac ndu-ŋga. Magoc asa naŋ ndē gauc sap mêtē naŋ Nalau Dabuŋ tac whiŋ, naŋ dōŋ ɣapaŋ, naŋ mbo seŋ ndōc tali-ŋga ma tap yom malō sa. ⁷ Bu gauc ɣalōm akwa-ŋga, inj êlêmē kēŋ kisa tēŋ Anötö, ɣahu bu inj sôc Anötö ndē yomsu ɣapu dom, ma bu gauc nem bu sôc ɣapu, dec oc tōm dom. ⁸ Lau naŋ si ɣalōm akwa gēm gōliŋ ɣac, naŋ oc tōm dom bu Anötö lic ɣac ɣayham.

⁹ Magoc ɣalōm akwa gēm gōliŋ mac dom, Anötö ndē Nalau mbo mac nem ɣalōm ma gēm gōliŋ mac. Kilisi ndē Nalau bu mbo mac nem ɣalōm dom, dec mac ati Kilisi ndē gēŋ dom. ¹⁰ Mac nem ɣamlic wêkaiŋ seŋ ambac ndu-ŋga tu mac akōm sac-ŋga. Magoc Kilisi mbo mac nem ɣalōm ma Anötö gêlic mac bu lau gitēŋ, ma tu dinaŋ-ŋga dec mac nem

gatôm wêkaiŋ sen̄ ambo tamli-ŋga. **11** Anötö naŋ uŋ Yisu Kilisi sa akēŋ lau batê-ŋga, naŋ ndê Nalau mbo nem ŋalôm, ma bocdinaŋ dec Anötö oc uŋ mac nem ŋamlic naŋ wêkaiŋ sen̄ ambac ndu-ŋga, naŋ sa mbo tali tiyham tu iŋ ndê Nalau-ŋga.

Nalau Dabuŋ kôm yac dati Anötö ndê balêkoc

12 Bocdinaŋ asidôwai, lêŋ wakuc yêc naŋ gic yac ŋawaê bu taŋkuc-ŋga, ma dasa lêŋ ŋalôm akwa-ŋga tiyham dom. **13** Nahu bu asa naŋ sa lêŋ dinaŋ, oc mbac ndu. Magoc mac bu apuc dômwêm mêtê ŋalôm akwa-ŋga ŋa Nalau ndê ŋaclai, dec mac oc ambo tamli. **14** Bu lau naŋ Anötö ndê Nalau gêm gôlinj ŋac, naŋ sêti Anötö ndê balêkoc. **15** Mac akôc Nalau dau su, ma iŋ kôm mac ati lau akin naŋ atöc nem ŋadau, naŋ dom. Mba! Nalau dau kôm mac ati Anötö ndê atui awhê ma ŋgac, ma tôm bu ata Anötö bocdec bu, “Damaŋ, Damaŋ.” **16** Ma Nalau dau gêm yac neŋ gatuŋ sa, dec taŋyalê bu dati Anötö ndê balêkoc, yomandô. **17** Ma yac bu dati Anötö ndê balêkoc, dec yac oc dawêkaiŋ Anötö ndê gêŋ lêŋsêm dawhiŋ Kilisi. Yomandô! Yac bu taŋkuc Kilisi ndê lêŋ hôc ŋandê-ŋga, dec oc datap ŋawasi sa dawhiŋ iŋ bocdinaŋ.

Nawasi naŋ oc meŋ sa têŋ têm ŋambu-ŋga

18 Têŋ ndoc aö gakôc gauc pi waêŋ ŋayham ti ŋawasi naŋ yac oc datap sa têŋ têm ŋambu-ŋga, naŋ galic gêŋ wapac hoŋ naŋ kwahic dec dahôc dambo nom, naŋ gitôm gêŋ sauŋ. **19** Bu gêŋ hoŋ naŋ Anötö kêŋ yêc nom, naŋ sêmbo sêtôm yac lau naŋ dakêŋ bataŋ ma dahôŋ têm naŋ Anötö oc tôc iŋ ndê balêkoc asê tiawê. **20** Bu gêŋ hoŋ naŋ

Anötö kēj, naŋ sêtisac sêwhinj yac ñamalac. Gêj dau si atac whinj lêj bocdinaŋ dom, magoc têj ndoc Anötö pucbo nom tu ñamalac si sac-ŋga, naŋ iŋ ndê yom kēj sac gêj hoŋ. Magoc yac dakêj bataŋ [21](#) bu tiŋambu Anötö oc êŋgapwêc gêj hoŋ su yêc lêj sêtisac-ŋga. Ma têj têm dinaj ñawapac dau oc êŋgwiniŋ yac lau naŋ dati Anötö ndê balêkoc, me gêj daŋ naŋ Anötö kēj, naŋ tiyham dom, ma yac ti gêj hoŋ oc dambo ñayham ma ti ñawasi eŋ.

[22](#) Yac tanjyalê bu têj têm ñamata-ŋga e meŋ, gêj hoŋ naŋ Anötö kēj, naŋ sêhôc ñawapac gitôm awhê naŋ bu kôc balêkoc, dec kêsahê ñandê ma tanj. [23](#) Ma ñawapac dau kêgwiniŋ gêj nom-ŋga tawasê dom, magoc kêgwiniŋ yac ñamalac whinj, dec dambo ti dangi yêc neŋ ñalôm. Yomandô yac dakôc Njalau Dabuŋ su gitôm gêj ñandô mbêc ñayham. Tigeŋ gêj ñatô naŋ Anötö gic bata bocdec bu, iŋ oc kôc yac sa dambo dawhiŋ iŋ datôm iŋ ndê balêkoc, ma nem yac si yêc ñawapac nom-ŋga, naŋ ñandô sa su dom. Bocdinaŋ kwahic dec yac dahôŋ ti dakêj bataŋ gêj ñayham naŋ oc meŋ sa. [24](#) Têj ndoc yac dakêj whinj ma datap Anötö ndê mwasinj nem yac si-ŋga sa, naŋ yac dakêj bataŋ bu oc datap gêj dinaj sa whinj. Magoc yac neŋ dakêj bataŋ ñahu sip gêj naŋ datap sa su, naŋ dom. Yac bu datap sa su, dec yac oc dakêj bataŋ dom. [25](#) Kwahic dec yac dakêj bataŋ gêj naŋ dalic su dom, ma dahôŋ dambo ti atac pa su eŋ.

Njalau Dabuŋ gêm yac sa tu dateŋ mbec-ŋga

[26](#) Ma gêj daŋ whinj bocdec bu. Njalau Dabuŋ oc nem yac sa têj ndoc yac bu dateŋ mbec magoc dapônda dauŋ tu gêj naŋ gic waê bu dateŋ mbec

pi-ŋga. Nalau dau oc nem yac awhaŋ tēŋ Anötö, pi dāŋgi naŋ yēc yac neŋ ŋalōm, naŋ tōm dom bu yac dauŋ dasōm asē. ²⁷ Ma Anötö naŋ kēyalē ŋamalac si ŋalōm e pi sa, naŋ oc ŋōgō mbec dau, ŋahu bu iŋlu ndē Nalau sēkōm si gēŋ hoŋ ŋa gauc tigeŋ. Ma Nalau dau teŋ mbec tu lau dabuŋ-ŋga, kēkuc Anötö ndē atac whiŋ solop.

Gēŋ dan gitōm dom bu kac yac su yēc Anötö ndē atac whiŋ

²⁸ Ma yac lau naŋ Anötö kēgalēm yac sa dati iŋ ndē lau, tōm iŋ dau gauc gēm tidōŋ, naŋ taŋyalē bu iŋ gēm gōlinj gēŋ hoŋ, bu ti yac lau naŋ atac whiŋ iŋ, naŋ neŋ ŋayham. ²⁹ Bu yac dahōc asē nom su dom, magoc Anötö kēyalē yac muŋ su, ma kēyalinj yac sa bu oc datōm iŋ Atuŋgac dau. Ma bocdinaŋ iŋ ndē Atuŋgac ti ŋgac mbēc, ma yac dati iŋ asii ti lhuwēi daēsam. ³⁰ Ma yac lau naŋ iŋ kēyalinj yac sa gwanaŋ su, naŋ iŋ kēgalēm yac, ma kēmasaŋ lēŋ tu dati lau gitēŋ ma datap iŋ ndē ŋawasi sa-ŋga.

³¹ Bocdinaŋ dasōm sake pi gēŋ hoŋ naŋ Anötö kōm tu yac-ŋga? Yac bu dambo Anötö ndē mwasinj ŋapu, dec ŋacyo bocke oc ku yac dulu? ³² Iŋ kēgaminj iŋ dau ndē Atu tēŋ yac dom, magoc kēkiŋ iŋ meŋ mbac ndu tu yac hoŋ-ŋga. Ma bocdinaŋ dec tōm dom bu iŋ êŋgaminj gēŋ dan tēŋ yac, iŋ oc êmwasinj yac ŋa gēŋ bocke naŋ dapônda naŋ. ³³ Iŋ dau kēyalinj yac sa, ma puŋ yac dōŋ ma sam yac bu lau gitēŋ. Tu dinaŋ-ŋga dec asa gitōm bu oc êŋgōlinj yom dan pi yac tēŋ iŋ? ³⁴ Ma asa gitōm bu oc êmatōc yac ma seŋ yac su? Nalēŋ mba. Nahu bu Yisu Kilisi naŋ mbac ndu ma Anötö uŋ iŋ sa mbo tali tiyham, naŋ ndöc Anötö ndē amba andō-ŋga, ma gēm yac

awhaŋ tēŋ iŋ. ³⁵⁻³⁶ Ma asa oc tōm bu êngaho yac su yēc Kilisi ndê atac whiŋ ŋalōm? ɻawapac daêsam sêyēc, tōm yom naŋ sêto yēc bocdec bu:

Tōm bêc hoŋ lau tac whiŋ bu sêndic yac ndu tu am-ŋga.

Nac sêlic yac datôm domba bu sêndic ndu-ŋga.

[BW 44:22]

Yac bu dahôc ɻawapac me ɻandê, ma lau bu sêkêŋ kisa yac me sêndic yac ɻa bieŋ, me yac bu dapônda gêŋ danen-ŋga me ɻakwê, me yac bu datap gêŋ ti ɻaclai naŋ bu seŋ yac su-ŋga sa, goc gêŋ dinan ɻadaŋ oc tōm dom bu êngaho yac su yēc Kilisi ndê atac whiŋ ŋalōm. ³⁷ Mba andô! Tu Kilisi naŋ atac whiŋ yac-ŋga, naŋ dec gêŋ hoŋ dinan ɻadaŋ oc tōm dom bu ku yac dulu. ³⁸⁻³⁹ Aêc! Aö kayalê tidôŋ bu gêŋ daŋ oc tōm dom bu kac yac su yēc Anötö ndê atac whiŋ, naŋ datap sa tu yac neŋ Pômdau Yisu Kilisi-ŋga. Mba! Yac bu dambac ndu me dambo tanli, yac bu dapi lôc balin me dasip gwêc ŋalōm dandi, tigeŋ oc tōm dom bu dasso Anötö ndê atac whiŋ. Ma anela me ɻalau sac me gêŋ kwahic dec-ŋga me gêŋ naŋ oc meŋ sa tiŋambu-ŋga, me ɻaclai tidaу-tidaу me gêŋ hoŋ naŋ Anötö kêŋ, naŋ ɻadaŋ oc tōm dom bu kac yac su yēc Anötö ndê atac whiŋ.

9

Pol tawalô lau Israel-ŋga naŋ sêkêŋ whiŋ Yisu dom

¹ Tu Kilisi naŋ aö gakêŋ whiŋ-ŋga, dec aö wasôm yom ɻandô têŋ mac. Aö oc waŋsau mac dom. Ma yēc aneŋ ɻalōm, naŋ ɻalau Dabuŋ gêm gôliŋ, dec kayalê tidôŋ bu aneŋ yom iŋ yom ɻandô eŋ.

² Aö wasôm têŋ mac bu aneŋ ɻalōm ɻawapac ɻapanj

ma kasahê ɳandê atu, tu lau Israel-ŋga daêsam naŋ sêkêŋ whin Kilisi dom-ŋga. ³ Lau dau aneŋ asidôwai ti lhuŋjwêi Israel-ŋga, naŋ yac mba ɳahu tigeŋ. Ma aö tac whin ndu andô bu ɳac lau dau sêkêŋ whin Kilisi. Aêc, tôm Anötö êmasuc aö su yêc Kilisi-ŋga, me lic aö gitôm ɳgac sac sambuc, magoc lêŋ dau bu nem ɳac sa tu sêkêŋ whin Yisu-ŋga, dec aö oc walic ɳayham bu wahôc ɳawapac dau.

⁴ Lau Israel-ŋga dinaŋ Anötö kêyalin ɳac sa bu sêti inj ndê lau, ma hoc inj ndê ɳawasi asê têŋ ɳac. Inj kêmatin pwac whin ɳac si apai, ma gic bata gêŋ ɳayham daêsam tu nem ɳac sa-ŋga. Inj kêŋ yomsu ti sakiŋ lôm dabuŋ-ŋga têŋ ɳac. ⁵ ɳac hoŋ sêsa akêŋ apai naŋ Anötö dau kêyalin sa sêti inj ndê lau. Ma lau Israel-ŋga si †Mesaya dau meŋ sa akêŋ apai dinaŋ si dac ɳapu. Kilisi dau dinaŋ inj Anötö ɳandô ma gêŋ hoŋ ɳadau, dec gic waê bu tampiŋ inj tôm bêc hoŋ. Yomandô!

Anötö ndê lêŋ êŋyaliŋ lau sa-ŋga

⁶ Anötö gic bata mwasiŋ hoŋ dinaŋ têŋ lau Israel-ŋga. Magoc tu ɳac si daêsam sêkêŋ whin Yisu dom-ŋga, dec dasôm bu Anötö ndê yom dau ɳandô mba lec dom. Mba! ɳahu bu lau hoŋ naŋ sêsa akêŋ †Jakob, naŋ sêti lau Israel-ŋga ɳandô, naŋ Anötö kêyalin ɳac sa, naŋ dom. ⁷ Ma ɳalêŋ tigeŋ, lau hoŋ naŋ sêsa akêŋ Abraham, naŋ dasam ɳac bu Abraham atui ɳandô dom. Tôm yom naŋ Anötö sôm têŋ Abraham bocdec bu:

Lau oc sêsam lau wakuc naŋ sêsa akêŋ Aisak bu am nem gôlôwac ɳandô. *[Gen 21:12]*

⁸ Yom dau ɳahu bocdec bu, Ismael lu Aisak lu lu sêsa akêŋ Abraham. Magoc Ismael ti ndê lau

wakuc sēti lau Israel-ŋga ɳandō, naŋ Anötö sam bu iŋ ndê atui, naŋ dom. Magoc Aisak ti ndê lau wakuc naŋ Anötö kēmatin pwac hēganōŋ ɳac, naŋ iŋ gēlic ɳac tôm Abraham ndê atui solop. ⁹ Bu Anötö kēmatin pwac tēŋ Abraham bocdec bu:

Tēŋ yala dan niŋga goc aö wambu wamen, ma am nem awhê Sara oc kôc nem atômŋgac dan su.

[Gen 18:10, 14]

¹⁰ Ma gauc nem balékoc lôcmpôŋ naŋ Rebeka kôc. Iŋlu si damba tigeŋ, yac mba abaŋ Aisak. ¹¹⁻¹² Magoc Rebeka kôc iŋlu su dom, ma sêkôm gêŋ ɳayham me sac dan su dom, naŋ Anötö kêyalin iŋlu si dan sa gwanaŋ. Iŋ sôm yom tēŋ Rebeka bocdec bu:

Ngac atu oc nem akiŋ ɳac sauŋ. [Gen 25:23]

Anötö kôm gêŋ dau kékuc iŋ ndê lêŋ ênyalin lau sa-ŋga tôm iŋ dau gauc gêm, ma tu gweleŋ naŋ ɳac dau sêkôm naŋ-ŋga dom. ¹³ Sêto Anötö ndê yom dan tiyham pi balê lu dau bocdec bu:

Aö atac whiŋ Jakob, magoc atac tec Iso. [Mal 1:2-3]

¹⁴ Bocdinaj oc dasôm sake? Dasôm bu Anötö ndê lêŋ ênyalin lau sa-ŋga iŋ solop dom, me? Mba andô! ¹⁵ Bu iŋ sôm yom têŋ Moses bocdec bu:

Aö oc taŋwalô lau naŋ aö atac whiŋ bu taŋwalô ɳac. Ma aö oc atac apu lau naŋ aö atac whiŋ bu atac apu ɳac. [Eks 33:19]

¹⁶ Bocdinaj Anötö kêyalin lau sa tu ɳac dau si atac whiŋ me ɳac si gweleŋ-ŋga dom, magoc tu iŋ dau ndê tawalô-ŋga.

¹⁷ Ma gêŋ dan tiyham. Sêto yom naŋ Anötö sôm têŋ Parao yêc bocdec bu:

Aö gakêj am ti kiŋ bu watôc aneŋ ɳaclai asê pi
gêŋ naŋ wakôm têŋ am, ma bu aneŋ ɳâe ɳawaê
sa ma nem nom ɳagameŋ sambuc ahuc. *[Eks
9:16]*

18 Nalêŋ dinaŋ Anötö tawalô lau naŋ in tac whiŋ
bu tawalô, ma lau naŋ in tac whiŋ bu kôm ɳac si
ŋalôm ɳadandi, naŋ kôm ɳadandi sa.

19 Ma mboe mac nem daŋ oc sôm yom têŋ aö
bocdec bu, “Lêŋ dau bu bocdinaŋ, dec tu sake-ŋga
Anötö puc yac neŋ giso asê? Bu Anötö kêmasaŋ
lêŋ hoŋ tidôŋ tôm in gauc gêm, dec asa gitôm bu
sa lêŋ dau-ŋga daŋ?” **20** Magoc aö wasôm têŋ am
ŋamalac bocke naŋ gauc gêm bu sôm yom kaiŋ
dinaŋ pi Anötö. Bocke ma lôŋ andô daŋ oc sôm têŋ
ŋamalac naŋ kêmasaŋ in ma ndac, “Tu sake-ŋga am
kêmasaŋ aö kaiŋ dindec?” **21** Yom dau solop dom.
Bu ŋamalac kêmasaŋ lôŋ-ŋga dau in ti ɳadau. Ma in
gitôm bu kôc nomdac ma êmasaŋ gêŋ ɳayham tiwaê
daŋ, me gêŋ ɳambwa waembâ daŋ, tôm in dau gauc
gêm.

22 Ma ɳalêŋ tigen Anötö in ɳadau, ma tôm bu kôm
tôm in atac whiŋ. Lau naŋ sêkôm sac sic waê bu
sêniŋga, ma Anötö bu tôc ndê atac ɳandê ti in ndê
ɳaclai asê têŋ ɳac, dec oc tôm. Ma in bu gauc nem
bu kôc ndê ɳalôm dôŋ, ma hê yom malô sa têŋ ɳac,
dec oc tôm bocdinaŋ. **23** In bu êŋkuc lêŋ yom malô-
ŋga dinaŋ, dec in oc kôm tu bu tôc in ndê ɳawasi
atu asê têŋ lau naŋ sic waê bu sêtap in ndê tawalô
sa-ŋga. Lau dau in kêyalin ɳac sa gwanaŋ su, bu
sêwêkaiŋ in ndê ɳawasi. **24** Yom dau hêganôŋ yac lau
naŋ Anötö kêgalêm yac sa, lau Israel, ma lau naŋ
lau Israel dom, naŋ bocdinaŋ. **25** Tôm Anötö ndê

yom naŋ propet Hosea to bocdec bu:

Lau naŋ aneŋ lau dom, naŋ aö oc wasam ɻac bu aneŋ lau. Ma bawhê naŋ muŋ-ŋga aö atac whinj in dom, naŋ aö oc wasam in bu aneŋ bawhê atac whinj-ŋga.

²⁶ Ma yêc gameŋ tigeŋ naŋ muŋ-ŋga aö gasôm têŋ ɻac bu, “Aneŋ lau mac dom,” naŋ lau oc sêsam ɻac bu, “Anötö Tali ɉadau ndê balêkoc.”
[Hos 2:23; 1:10]

²⁷ Ma propet Aisaya hoc yom asê pi lau Israel-ŋga bocdec bu:

Lau Israel-ŋga ɻac lau daêsam ɻandô, gitôm gaŋgac gwêc-ŋga. Magoc Pômdau oc nem hoŋ si dom, oc kôc ɻandôlu eŋ sa. ²⁸ Bu yom naŋ Pômdau kêmatin tidôŋ, naŋ in oc kôm ɻandô sa yêc nom, ma ndic dabinj ɻagahô eŋ. *[Ais 10:22-23]*

²⁹ Ma tôm yom daŋ tiyham naŋ Aisaya hoc asê muŋ su:

Pômdau ɉaclai ɉadau bu hu yac neŋ lau wakuc ɻatô siŋ gacgeŋ sêmbo dom, dec oc dandinaj gitôm malac Sodom ma Gomora. *[Ais 1:9]*

Lau Israel-ŋga sêkêŋ whinj dom, dec sêti lau gitêŋ dom

³⁰ Bocdinaŋ oc dasôm sake pi Anötö ndê lêŋ êŋyalinj lau sa-ŋga? Lau naŋ lau Israel dom, naŋ sêkôm gweleŋ tu sêŋsalê lêŋ gitêŋ-ŋga dom, magoc sêtap sa tu sêkêŋ whinj gweleŋ naŋ Yisu kôm tu ɻac-ŋga. ³¹ Ma lau Israel-ŋga sêŋsalê lêŋ gitêŋ yêc yomsu ɻalôm, magoc sêtap sa dom. ³² Ma sêtap sa dom, ɻahu bu ɻac sêkêŋ whinj gweleŋ naŋ Yisu kôm tu ɻac-ŋga, naŋ dom. ɉac gauc gêm bu ɻac oc sêti lau

gitēŋ, tu ɳac dau si gwelenŋ-ŋga, ma bocdinaŋ ɳac sêtôm lau naŋ sêtîŋ gahi pi hoc ma sêpeŋ. ³³ Tôm yom naŋ sêto yêc bocdec bu:

Alic su naŋ! Aö gakêŋ hoc daŋ kalhac Lôc †Sayon, naŋ lau daêsam oc sêtîŋ gahi pi ma sêpeŋ. Magoc asa naŋ kêŋ whinŋ iŋ, naŋ oc maya dau dom. *[Ais 28:16; 8:14]*

10

¹ O asidôwai. Aö tac whinŋ ɳandô ma gateŋ mbec têŋ Anötö, bu lau Israel-ŋga naŋ sêkêŋ whinŋ Yisu dom, naŋ oc sêkêŋ whinŋ dec sêtap Anötö ndê mwasiŋ nem ɳac si-ŋga sa. ² A ö wasôm yomandô bu lau dau sêyêm dau su bu sêsa Anötö ndê lêŋ. ɳac sêkôm gêŋ dau, magoc ɳac si gauc sa pi yom ɳandô dom. ³ Nahu bu ɳac gauc gêm bu sêtôc ɳac dau si lêŋ asê tôm lêŋ gitêŋ. Magoc ɳac sem gauc lêŋ naŋ Anötö kêmasaŋ bu sam yac bu lau gitêŋ, dec sêsoč lêŋ dau ɳapu dom. ⁴ Bu Kilisi dau ndê lêŋ gitêŋ gic bata yomsu hoŋ, dec lau hoŋ naŋ sêkêŋ whinŋ Yisu, naŋ Anötö gêlic ɳac bu lau gitêŋ.

Anötö ndê lêŋ nem lau si-ŋga

⁵ Lêŋ bu lau sêti lau gitêŋ tu sêŋkuc yomsu-ŋga, naŋ Moses whê sa bocdec bu:

Asa naŋ bu êŋkuc yomsu hoŋ ɳapep eŋ, naŋ oc ndöc tali tu yomsu-ŋga. *[Lev 18:5]*

⁶⁻⁷ Magoc ɳamalac daŋ oc tôm bu t i ɳamalac gitêŋ tu iŋ kêkuc yomsu-ŋga lec dom. Lêŋ dati lau gitêŋ tu yac neŋ dakêŋ whinŋ-ŋga, naŋ meŋ sa tiawê su. Tôm yom daŋ naŋ sêto yêc bocdec bu:

Akôc gauc daêsam pi asa oc pi undambê ndi, me sip lambwam ndi dom. *[Diut 30:13]*

Bocdinaŋ yac dapônda ɳamalac daŋ bu pi undambê ndi bu kôc Kilisi sa sip meŋ, me bu sip lambwam ndi bu kôc iŋ su akêŋ lau batê-ŋga dom, tu bu datap yom pi lêŋ dakêŋ whiŋ-ŋga ɳahu sa. Mba! ⁸ Bu yom pi lêŋ dakêŋ whiŋ-ŋga dec yac ahoc asê têŋ mac su, tôm yom naŋ sêto yêc, naŋ sôm bocdec bu:

Yom dau siŋ dau têŋ mac dom, bu mac akôc sa sip nem ɳalôm su, ma mac asôm ambo. *[Diut 30:14]*

⁹ Ma yom dau bocdec bu. Am bu kêŋ whiŋ ti nem ɳalôm sambuc bu Anötö uŋ Yisu sa akêŋ lau batê-ŋga, ma whamsuŋ hoc yom asê bu Yisu iŋ am nem Pômdau, dec Anötö oc nem am si. ¹⁰ Bu yêc am nem ɳalôm naŋ am kêŋ whiŋ, dec Anötö gêlic am bu ɳamalac gitêŋ, ma yêc am nem whamsuŋ am hoc nem kêŋ whiŋ Yisu-ŋga asê, dec Anötö gêm am si. ¹¹ Tôm Anötö ndê yom naŋ sêto yêc naŋ sôm:

Asa naŋ kêŋ whiŋ iŋ, naŋ oc maya dau dom. *[Ais 28:16]*

¹² Bu Anötö gêlic lau Israel ma lau naŋ lau Israel dom, naŋ ɳalêŋ tigeŋ. Pômdau tigeŋ dec ti lau hoŋ si Pômdau, ma lau hoŋ naŋ sêta iŋ ndê ɳaê, naŋ iŋ oc êmwasiŋ ɳac ɳandô. ¹³ Tôm yom naŋ propet Joel to yêc bocdec bu:

Lau hoŋ naŋ sêta Pômdau ndê ɳaê, naŋ Anötö oc nem ɳac si. *[Joel 2:32]*

¹⁴ Magoc lau naŋ sêkêŋ whiŋ Yisu su dom, naŋ oc sêta iŋ ndê ɳaê ɳalêŋ bocke? ɳac bu sêŋgô iŋ ɳawaê dom, dec oc sêkêŋ whiŋ ɳalêŋ bocke? Ma lau bu sêhoc ɳawaê ɳayham asê têŋ ɳac dom, dec oc sêŋgô ɳalêŋ bocke? ¹⁵ Ma lau bu sêŋkiŋ lau ahen-ŋga sêsa

sêndi dom, dec ɳawaê ɳayham dau oc hôc asê lau
dau ɳalêŋ bocke? Tôm yom naŋ sêto yêc naŋ sôm:

Lau naŋ sêŋgô ɳawaê ɳayham, naŋ oc sêtisambuc
lau aheŋ-ɳga naŋ sêŋsêlêŋ sêmeŋ tu sêhoc
ɳawaê dau asê-ɳga. [Ais 52:7]

16-17 Bocdinaŋ yac neŋ dakêŋ whiŋ ɳahu sip
daŋgô ɳawaê ɳayham, ma yom pi Kilisi ti ɳawaê
ɳayham ɳahu. Magoc lau Israel-ɳga hoŋ sêkôc
ɳawaê ɳayham sa dom. Tôm Aisaya to:

O Pômdau, lau daŋ sêkêŋ whiŋ yom naŋ yac ahoc
asê, naŋ dom. [Ais 53:1a]

18 Mac gauc gêm bocke? Lau Israel-ɳga sêŋgô
ɳawaê ɳayham su, me mba? Aêc, ɳac sêŋgô su, tôm
yom naŋ sêto yêc, naŋ sôm bocdec bu:

Yom dau sa têŋ nom ɳabatiŋ hoŋ, ma lau sêŋgô
yêc nom ɳagameŋ sambob. [BW 19:4]

19-21 Ma gêndac daŋ tiyham bocdec bu, lau Israel-
ɳga sêŋyalê yom naŋ sêŋgô su, me mba? Gauc nem
Anötö ndê yom, naŋ Aisaya to pi lau Israel-ɳga
bocdec bu:

Tôm bêc hoŋ aõ kamatôc amaŋ tu wakôc lau
dau sa-ɳga, magoc ɳac lau daŋgapêc ma ɳac si
ɳalôm ɳadandi. [Ais 65:2]

Lau Israel-ɳga sêtec bu sêkôc ɳawaê ɳayham sa,
ma bocdinaŋ yom dau sa têŋ lau gameŋ apa-ɳga
gi. Yom naŋ Anötö sôm têŋ lau Israel-ɳga, naŋ whê
gêŋ dau sa, tôm Moses to yêc bocdec bu:

Aõ oc watoc lau waêmبا sa, e kôm mac anem
lêmuŋ ɳac. Ma watoc lau gauc mbasi-ɳga sa,
e kôm mac atac ɳandê. [Diut 32:31]

Ma Aisaya dau sôm yom yêc awê bocdec bu:

Lau naŋ sêŋsalê aö dom, naŋ sêtap aö sa. Ma
gatôc dauŋ asê têŋ lau naŋ sêndac aö dom naŋ.
[Ais 65:1]

11

Anötö puc dômbwê iŋ ndê lau Israel-ŋga dom

¹ Bocdinaŋ aö bu wandac mac bocdec bu. Mac
gauc gêm bu Anötö puc dômbwê iŋ ndê lau Israel-
ŋga, me? Aö wasôm mba andô, bu aö dauŋ ŋgac
Israel-ŋga, ma Abraham ndê wakuc daŋ, naŋ gasa
akêŋ Benjamin ndê toŋ. ² Anötö puc dômbwê iŋ
ndê lau naŋ iŋ kêyaliŋ ŋac sa gwananŋ su, naŋ dom.
Gauc nem yom naŋ sêto yêc pi Elaija, têŋ ndoc iŋ
pu lau Israel-ŋga têŋ Anötö, ma sôm yom bocdec
bu:

³ Pômdau, ŋac sic am nem lau propet ndu, ma
sêseŋ alta naŋ lau sem akinŋ am sêmbo, naŋ
su. Aö taŋwasêŋ dec gasôc am ŋapu, ma ŋac bu
sêndic aö ndu. [1 Kin 19:10, 14]

⁴ Gauc nem yom naŋ Anötö ô têŋ iŋ bocdec bu:
Aö gasinŋ aneŋ lau 7,000 sêmbo lau Israel-ŋga
ŋalôm, naŋ sêpôŋ haduc têŋ anötö tasaŋ Baal
dom. [1 Kin 19:18]

⁵ Nalêŋ tigeŋ kwahic dec lau toŋ daŋ sêmbo lau
Israel-ŋga ŋalôm, naŋ Anötö kêyaliŋ ŋac sa sêti iŋ
ndê, kêkuc iŋ ndêlêŋ êmwasiŋ lau ŋambwa-ŋga. ⁶ Ŋac
sêtap Anötö ndê mwasiŋ sa tu ŋac dau si sakinŋ-
ŋga dom. Anötö bu ênyaliŋ ŋac sa tu ŋac si sakinŋ-
ŋga, dec yom naŋ dasôm pi iŋ ndêlêŋ êmwasiŋ lau
ŋambwa-ŋga, naŋ oc yom ŋandô dom.

⁷ Bocdinaŋ oc dasôm sake? Lau Israel-ŋga sêkôm
mwasac bu sêti lau gitêŋ yêc Anötö aŋgô-ŋga,

magoc gitôm dom. Magoc ɳac si lau naŋ Anötö dau kêyalin ɳac sa, naŋ sêtap lêŋ sêti lau gitêŋ-ɳga sa. Ma ɳac si lau ɳatô, Anötö kôm ɳac si ɳalôm ɳadandi sa,⁸ tôm yom naŋ sêto yêc bocdec bu:

Anötö kêŋ ɳasec kôm ɳac si ɳalôm ahuc, ma inj kôm ɳac si tandô tipec ma ɳac si dan̄gasuŋ hôc ahuc. Ma ɳac sêmbo bocdinaj ɳapaŋ e meŋ têŋ kwahic dec. [Diut 29:4; Ais 29:10]

⁹ Ma Dawid to yom bocdec bu:

Mwasinj naŋ ɳac bu sêneŋ-ɳga, naŋ oc kac dau kwi ma kêŋ sac ɳac, gitôm huc me akô bu kôc ɳac dôŋ-ɳga, ma gitôm hoc sêtiŋ gahi pi-ɳga, ma gitôm ɳagêyô sac bu kêŋ wapac ɳac.

¹⁰ Anötö kôm ɳac si tandô tipec, e sêlic gameŋ apu. Ma inj kêŋ ɳac sêhôc ɳawapac ɳapaŋ e dômbwêkwa mbwê-alö. [BW 69:22-23]

Lau apa sêtap mwasinj sa tu lau Israel-ɳga

¹¹ Aö bu wakêŋ gêndac danj tiyham. Mac gauc gêm bu lau Israel-ɳga sêpeŋ e siŋga gacgeŋ, me mba? Aö wasôm têŋ mac bu mba andô. Magoc tu lau Israel si giso-ɳga, dec lau naŋ lau Israel dom, naŋ sêtap Anötö ndê lêŋ nem lau si-ɳga sa. Ma gêŋ dau oc kôm lau Israel-ɳga sênem lêmuŋ lau apa dau.

¹² Magoc ɳac si giso dau ti seŋ bu lau apa hoŋ sêtap Anötö ndê mwasinj sa hôc gêlêc. Ma ɳac lau Israel-ɳga dau bu sêkac dau kwi ma sêkêŋ whiŋ Yisu, dec lau daêsam andô oc sêtap Anötö ndê mwasinj sa êŋlêc, ɳac lau Israel-ɳga dau, ma lau gameŋ apa-ɳga sêwhiŋ.

¹³ Aö gato yom dindec têŋ mac lau naŋ lau Israel dom. Anötö kêyalin aö sa gati aposel tu bu wahoc ɳawaê ɳayham asê têŋ mac-ɳga. Ma aö atac

ηayham atu tu aneŋ gweleŋ dindec-ηga. ¹⁴ Nahu bu mboe aneŋ asidôwai Israel-ηga ηatô oc sênenm lêmuŋ Anötö ndê mwasiŋ naŋ mac atap sa, e kôm ηac sênenm dau kwi ma sêtap lêŋ Anötö nem ηac si-ηga sa sêwhiŋ. ¹⁵ Kwahic dec ηac sêkôc ηawaê ηayham pi Yisu sa dom, ma tu dinan-ηga dec lau gameŋ apa-ηga hoŋ sêŋgô ηawaê naŋ hê wamba ηac têŋ Anötö. Magoc lau Israel-ηga bu sêkôc ηawaê ηayham dau sa ma sêkêŋ whinj Yisu, dec ηac oc sêtôm lau naŋ sêtisa akêŋ lau batê-ηga. ¹⁶ Gêŋ ηandô mbêc naŋ dakêŋ ti da têŋ Anötö naŋ gêŋ dabuŋ, ma oc kôm gêŋ ηandô ηambu-ηga hoŋ ti dabuŋ. Ma Anötö bu lic a danj ηawakac bu dabuŋ, dec inj oc lic a dau ηasaŋgac hoŋ bu dabuŋ bocdinaŋ.*

Pol gêm dôhôŋ lau Israel pi a olib

¹⁷ Lau Israel-ηga gitôm a ṭolib malac-ηga naŋ Anötö tim ηasaŋgac ηatô kic. Ma mac lau naŋ lau Israel dom, mac atôm a olib salen-ηga ηasili. Ma Anötö kôc mac, ma sô mac dôŋ pi a olib malac-ηga dau ηampê, awhiŋ a dau ηasaŋgac ηatô, bu atap ηakwi ηayham sa yêc a olib dinanj ηawakac. ¹⁸ Bocdinaŋ atoc daôm sa tu mac akôc a ηasaŋgac naŋ siŋga su, naŋ si mala-ηga dom. Mac bu akôm bocdinaŋ, dec gauc nem bu mac akêŋ ηaŋga têŋ a olib dau dom, magoc mac daôm akôc ηaŋga yêc a olib ηawakac. ¹⁹ Ma mboe mac gauc gêm bu Anötö tim ηasaŋgac ηatô su, tu bu kôc mac sa aô ηac su.

* **11:16:** Yom dau inj gitôm yom gôliŋ danj. Yom pi gêŋ ηandô mbêc ma a ηawakac, naŋ hêganôŋ lau Israel-ηga si apai. Pol bu tôc asê bu Anötö kôc lau Israel-ηga si apai sa ma gêlic ηac bu lau dabuŋ, ma ηac si lau wakuc bu sêkêŋ whinj Yisu, dec inj oc lic ηac bu lau dabuŋ ηalêŋ tigeŋ.

²⁰ Yom dau inj yomandô, tigen gauc nem bocdec bu, Anötö kôc mac sa tu mac akêj whinj Yisu-ŋga, ma tim ŋac su bu ŋac sêkêj whinj dom. Bocdinaŋ atoc daôm sa dom, magoc atoc Anötö. ²¹ Bu a dau ŋasaŋgac solop naŋ Anötö tim ŋatô su. Ma inj gitôm bu oc tim mac su bocdinaŋ.

²² Tu dinan-ŋga dec anyalê tidôj bu Anötö inj Anötö êmwasiŋ lau-ŋga, ma inj Anötö kêj ŋagêyô têj lau-ŋga whinj. Inj kêj ŋagêyô têj lau naŋ sêpeŋ, magoc kêmwasiŋ mac. Asap inj ndê mwasinj dinan dôj. Bu mba, dec inj oc tim mac su. ²³ Ma lau Israel-ŋga dinan bu sêkac dau kwi ma sêkêj whinj Yisu, dec Anötö oc kôc ŋac sa, ma inj gitôm bu kêj ŋac sêmbu sêndi sêsap a olib dau dôj tiyham. ²⁴ Bu mac a olib malac-ŋga ŋasaŋgac solop dom, magoc Anötö kôc mac yêc a olib saleŋ-ŋga, ma kêj mac ati a olib malac-ŋga ŋasaŋgac. Bocdinaŋ oc ŋawapac dom bu inj kôc a dau ŋasaŋgac solop, ma kêj ŋac sêlhac si a ŋampê solop tiyham.

Anötö tawalô lau hoŋ

²⁵ O asidôwai. Yom dindec ŋahu sip ŋalôm gi, ma aö tac whinj bu mac anyalê ŋapep. Ma bocdinaŋ oc tôm dom bu mac atoc daôm sa. Anötö kôm lau Israel-ŋga si ŋalôm ŋadandi sa, bu sêmbo bocdinaŋ e lau gameŋ apa-ŋga hoŋ naŋ Anötö kêgalêm ŋac sa, naŋ sêmeŋ sêsoč Anötö ndê gôliŋ ŋapu su naŋ. ²⁶ Ma ŋalêj dinan dec Anötö oc nem lau Israel-ŋga hoŋ si, tôm yom naŋ sêto yêc bocdec bu:

Ngac nem lau si-ŋga oc meŋ sa akêj Lôc Sayon.

Ma inj oc nem Jakob ndê wakuc kwi sêhu mêtê sac sinj. ²⁷ Ma aö wamatinj aneŋ pwac whinj

ŋac, tēŋ tēm naŋ aö oc wasuc ŋac si sac kwi.
[Ais 59:20-21]

28 Lau Israel-ŋga sêti Anötö ndê ŋacyo, ŋahu bu sêkôc ŋawaê ŋayham pi Yisu sa dom. Ma tu dinan-ŋga ŋawaê dau golom mac. Magoc Anötö kêyalin ŋac sa gwanaŋ su, dec tac whinj ŋac tu abanji Israel-ŋga. **29** Bu galem ti mwasinj naŋ Anötö gic bata tēŋ lau, naŋ iŋ oc tôm dom bu seŋ su. **30-31** Mun-ŋga mac lau gamen apa-ŋga dangapêc tēŋ Anötö. Magoc kwahic dec lau Israel-ŋga dangapêc tēŋ Anötö, dec mac atap iŋ ndê tawalô sa. Ma tu dinan-ŋga ŋac lau Israel-ŋga naŋ kwahic dec dangapêc tēŋ Anötö, naŋ tiŋambu oc sêtap iŋ ndê tawalô sa sêwhinj. **32** Bu Anötö sam lau hoŋ bu lau dangapêc-ŋga. Iŋ tōc gēŋ dau tiawê, dec lau hoŋ naŋ bu sênen dandi kwi, naŋ iŋ oc tawalô ŋac.

Datoc Anötö ndê waê sa

33 Oyaê. Anötö ndê mwasinj ti iŋ ndê gauc iŋ gēŋ atu andô, ma iŋ kêyalê gēŋ hoŋ e pi sa timala eŋ. Asa oc nditôm bu êŋyalê iŋ ndê lêŋ me yom naŋ tidônj yêc iŋ-ŋga?

34 Asa kêyalê Pômdau ndê gauc, me gitôm bu kêŋ gauc tēŋ iŋ? **[Ais 40:13]**

35 Ma asa tôm bu kêŋ gêŋ ŋayham danj tēŋ Anötö, dec Anötö oc kêŋ gêŋ tēŋ iŋ ô? **[Job 41:11]**

36 Bu gêŋ hoŋ sa akêŋ iŋ ndê, ma iŋ ti gêŋ hoŋ ŋahu ma ti gêŋ hoŋ ŋadau bocdinaŋ. Datoc iŋ ndê waê sa titêm-titêm. Yomandô.

12

Dasa neŋ lêŋ wakuc dawhiŋ Kilisi

¹ O asidôwai. Gauc nem yom hoj nañ aö gasôm tu gawhê Anötö ndê tawalô sa têj mac-ŋga nañ. Dec akêj daôm sambuc bu anem akiŋ Anötö tôm mac nem bêc ambo tamli-ŋga hoj. Akêj daôm sambuc atôm da tali ma dabuŋ, nañ oc ndic Anötö tandô ŋayham. Mac nem lêj ŋandô anjuc Njalau Dabuŋ tu anem akiŋ Anötö-ŋga dau dinaj. ² Aŋsêlêj ti asa nem lêj atôm lau nom dindec-ŋga dom, magoc ati lau wakuc tôm Anötö kêj gauc wakuc têj mac. Ma bocdinaŋ mac oc atôm bu aŋsahê gêj hoj, ma aŋyalê mêtê gitêj, ma mêtê ŋawasi ma mêtê nañ oc ndic Anötö tandô ŋayham, nañ inj atac whiŋ bu yac dakôm.

Anötö kêmwasinj yac ŋalêj têjtêj

³ Tôm Anötö ndê mwasiŋ puc aö dôj, dec wasôm têj mac hoj têjtêj ndi, bu atoc daôm sa êŋlêc dom, magoc akôc gauc ŋapep pi daôm. Bu mac hoj akêj whiŋ Yisu tôm mwasiŋ nañ Anötö dau gic sam têj mac ŋalêj têjtêj. ⁴ Yac tanyalê bu ŋamalac danj inj ŋamlic tigeŋ, magoc ŋagêj daêsam sêyêc inj ndê ŋamlic tigeŋ dinaj. Ma gêj dau sêwêkaiŋ gweleŋ têjtêj. ⁵ Ma ŋalêj tigeŋ dinaj, yac lau daêsam nañ dakêj whiŋ Kilisi su, nañ dati Yisu ndê gôlôwac dabuŋ tigeŋ, ma yac tigeŋ-tigeŋ dambo tu danem lau hoj nañ sêmbo gôlôwac dabuŋ ŋalôm, nañ sa. ⁶ Yac dawêkaiŋ mwasiŋ dakôm gweleŋ-ŋga têjtêj, tôm Anötö kêmwasinj yac ŋalêj. Asa nañ tap mwasiŋ hoc yom asê tôm propet-ŋga sa, nañ kôm tôm inj ndê kêj whiŋ tôc asê. ⁷ Asa nañ tap mwasiŋ nem akiŋ gôlôwac-ŋga sa, nañ nem akiŋ maŋ. Ma inj nañ tap mwasiŋ sa bu êndôhôj Anötö ndê yom têj lau, nañ bocdinaŋ. ⁸ Asa nañ tap mwasiŋ sôm

yom ɳayham-ɳayham tu puc lau dôŋ-ɳga sa, naŋ kôm. Ma asa naŋ Anötö ndê mwasiŋ kac iŋ bu kêŋ gêŋ tu nem lau ɳalôm sawa sa-ɳga, naŋ kêŋ ti ndê ɳalôm sambuc. Asa naŋ tap mwasiŋ bu nem gôliŋ gôlôwac-ɳga sa, naŋ kôm ti licbalê, ma iŋ naŋ tap mwasiŋ tawalô lau-ɳga sa, naŋ tawalô lau ti atac ɳayham.

Mêtê atac whiŋ-ɳga

⁹ Mêtê atac whiŋ-ɳga iŋ gêŋ dasôm ɳambwa-ɳga dom. Dakôm ɳandô sa ɳalêŋ bocdec. Yac atac tec mêtê sac ma dasap mêtê ɳayham dôŋ. ¹⁰ Dakêŋ neŋ ɳalôm sambuc tu atac whiŋ asidôwai-ɳga, ma datoc ɳac sa hôc gêlêc dauŋ dandic ɳawaê. ¹¹ Dakêŋ dauŋ sambuc tu danem akiŋ Pômdau-ɳga, ma dakôm ti ɳalôm lu-lu dom. ¹² Gêŋ naŋ dakêŋ bataŋ bu Anötö kôm, naŋ dahôŋ ti atac ɳayham, dalhac ɳaŋga tu dahôc ɳawapac-ɳga ti neŋ atac pa su, ma dasap mêtê dateŋ mbec-ɳga dôŋ ɳapaŋ. ¹³ Dakêŋ gêŋ tu danem Anötö ndê lau dabuŋ naŋ sêpônda dau, naŋ sa-ɳga, ma dandic ya ɳac. ¹⁴ Lau naŋ sêkêŋ kisa mac, naŋ apucbo ɳac dom, magoc andac Anötö bu nem mbec ɳac. ¹⁵ Lau bu sêkôm atac ɳayham, dec atac ɳayham awhiŋ ɳac. Ma lau bu sêtaŋ, naŋ atan awhiŋ ɳac. ¹⁶ Apiŋ daôm dôŋ ti ɳalôm tigeŋ. Atoc daôm sa me alic daôm bu lau ti gauc atu-tu dom, magoc atac whiŋ lau waêm̄ba ma ambo ahê ɳac dom.

¹⁷ Akôm mêtê sac ô sac naŋ sêkôm têŋ mac, naŋ dom. Ayob daôm ɳapep bu akôm mêtê naŋ lau hoŋ sêlic bu ɳayham eŋ. ¹⁸ Aŋsahê bu nditôm, dec ambo awhiŋ lau ti yom malô eŋ, ma mac daôm akôm gêŋ daŋ bu aseŋ yom malô su dom. ¹⁹ O aneŋ

asidôwai, akêj ñagêyô ô sac dom, magoc akêj lau nañ sêkôm sac têj mac sêsip Anötö amba e sêtap inj dau ndê atac ñandê sa. Bu sêto yom dañ yêc, nañ sôm bocdec bu:

Pômdau sôm, “Gweleñ sac ñagêyô-ñga yêc aö amañ, ma aö dauñ oc wakêj.” [\[Diut 32:35\]](#)

[20](#) Akêj ñagêyô dom, magoc akôm tôm yom nañ sêto yêc bocdec bu:

Am nem ñacyo bu gêj yô inj, nañ kêj gêj inj neñ.

Inj bu bu yô inj, nañ kêj bu inj nôm. Am bu kôm bocdinañ, dec oc kôm inj maya dau ñalêj sac.

[\[Prov 25:21-22\]](#)

[21](#) Ayob bu sac ku mac dulu dom, magoc akôm mêtê ñayham eñ e aku sac dulu.

13

Dasôc gôliñwaga ñapu

[1](#) Gôliñwaga hoñ nañ sem gôliñ sêmbo nom, nañ si ñaclai ñahu yêc Anötö, ma inj dau kêj ñasawa têj ñac bu sênem gôliñ. Ñac si dañ hôc asê ñambwa dom. Bocdinañ lau hoñ sêsoç ñac ñapu sêndic ñawaê. [2](#) Asa nañ tec bu sôc gôliñwaga ñapu, nañ tec gôliñ nañ Anötö dau kêj, ma inj oc tap matôc sa. [3](#) Gôliñwaga si ñaclai yêc bu sêmatôc lau, magoc ñac si matôc dau gic waê lau nañ sêkôm mêtê ñayham, nañ dom, gic waê lau nañ sêkôm mêtê sac. Tu dinañ-ñga dec akôm mêtê ñayham eñ, ma gôliñwaga oc sêlic mac ñayham, ma mac oc atöc daõm tu gôliñwaga si matôc-ñga dom. [4](#) Nahu bu ñac sêti Anötö ndê lau akiñ bu sêyob yac dambo ñayham-ñga. Magoc mac bu akôm mêtê sac, nañ atöc daõm, bu ñac sêkôc ñaclai bu sêmatôc lau, ma ñaclai dau inj gêj ñambwa

dom. Nac Anötö ndê lau akiñ nañ sêô iñ su sêmbo nom, bu sêkêj ñagêyô têj lau nañ sêkôm mêtê sac nañ. ⁵ Tu dinaj-ña dec dasôc gôliñwaga ñapu. Nahu bu ñac si ñaclai yêc bu sêmatôc yac. Ma gêj dañ whiñ bocdec bu. Tañyalê yêc neñ ñalôm bu dasôc ñac ñapu, iñ lêj solop.

⁶ Gôliñwaga dinaj sêkêj si têm tu sênenm gôliñ tôm Anötö ndê lau akiñ, ma tu dinaj-ña dec iñ solop bu mac akêj takis bu anemlhi ñac. ⁷ Aêc! Gêj bocke nañ mac ac waê bu akêj, nañ akêj. Takis me mone bocke nañ mac ac waê bu akêj, nañ akêj. Lau nañ sic waê bu mac atoc ñac sa, nañ dec atoc ñac sa, ma lau ti ñaclai, nañ asôc ñac ñapu ñapep.

Mêtê atac whiñ asidôwai-ña

⁸ Ayob daôm bu tôp dañ yêc mac-ña dom. Tôp tigeñ yêc mac-ña, nañ bu akêj nem atac whiñ lom daôm. Bu asa nañ tac whiñ iñ ndê asidôwa, nañ kôm Anötö ndê yomsu hoñ ñandô sa. ⁹ Bu yomsu nañ Moses to bocdec bu, “*Kôm gêj mockain-ña dom. Ndic ñamalac ndu dom. Nem kañ gêj dom,*” ma “*Tamgatu gêj dom,*” ma yomsu ñatô hoñ, nañ nahu sip yomsu tigeñ dindec, “*Atac whiñ lau meñpan am-ña gitôm am atac whiñ daôm.*” ¹⁰ Asa nañ kékuc mêtê atac whiñ-ña, nañ oc kôm lau meñpan iñ-ña ñayom dom. Bocdinañ mêtê atac whiñ lau-ña kôm yomsu hoñ ñandô sa.

Bêc ñambu-ña meñ kêpiñ

¹¹ Asap mêtê atac whiñ-ña dôj ñapañ, bu mac añyalê têm kwahic dec-ña su. Têj ndoc dakêj whiñ tiwakuc, nañ dalic bu bêc datap Anötö ndê mwasiñ nem yac si-ña ña-ñandô sa, nañ yêc ahê

dôj yêc. Magoc kwahic dec bêc dau menj kêpij su. Bocdinaŋ ayêc bêc dom, anem ali. ¹² Ôbwêc pacndê su, ma kêpij bu lajsê. Bocdinaŋ dahu mêtê ñasec-ŋga hoj siŋ, ma dasap mêtê ñawê-ŋga dôj, gitôm dakôc wapa dandic siŋ-ŋga sa. ¹³ Taŋsêlêŋ ti dasa neŋ lêŋ ñapep, nditôm lau naŋ sêmbo ñawê ñalôm. Dakôm mêtê sac atac ñagalac-ŋga me danôm gêŋ êŋiŋ yac-ŋga dom. Dasa lêŋ mockaiŋ-ŋga ma dakôm mêtê mayan-ŋga dom. Ma dahu mêtê atac ñandê-ŋga ma mêtê lêmun-ŋga hoj siŋ. ¹⁴ Aŋsêlêŋ ti asa nem lêŋ aŋkuc Pômdau Yisu Kilisi, gitôm mac asôc iŋ ti nem ñakwê. Ma mac nem ñalôm akwa bu êŋgilí mac bu akôm sac, naŋ goc asôc ñapu me akôm ñandô sa dom.

14

Yom pi lau naŋ sêkêŋ whiŋ ñaŋga dom

¹ Lau naŋ si sêkêŋ whiŋ ñaŋga dom, naŋ akôc iŋac sa, ma alic ñac sac pi yom ma pi lêŋ naŋ Pômdau tôc tiawê têŋ yac dom, naŋ dom. ² Lau ñatô sêkêŋ whiŋ ñaŋga dec seŋ gêŋ hoj. Magoc lau ñatô sêkêŋ whiŋ ñaŋga dom, dec sêkêŋ yao wata ma seŋ dom. ³ Am asa naŋ gêlic gêŋ hoj ñayham tu neŋ-ŋga, naŋ pu lau naŋ sêtec wata, naŋ dom. Ma am asa naŋ gêŋ wata dom, naŋ pu lau naŋ seŋ wata, naŋ dom. Bu Anötö kôc lau dau sa su. ⁴ Am asa dec gauc gêm bu êmatôc ñamalac daŋ ndê ñgac akiŋ? Ngac akiŋ dau ndê ñadau oc êŋsahê iŋ ndê lêŋ, ma sôm bu iŋ lhac, me iŋ peŋ. Ma iŋ oc lhac, ñahu bu Pômdau gitôm bu puc iŋ dôj.

⁵ Ma yom daŋ tiyham. Lau ñatô sêtoc bêc daŋ sa bu bêc dabuŋ hôc gêlêc bêc ñatô su. Ma lau ñatô

sêlic bêc hoṇ tôm dau. Magoc ḥalêŋ solop bu lau hoṇ sêkôc gauc pi lêŋ sênem akiŋ Anötö-ŋga, ma sêkôm tôm ḥac dau si ḥalôm kac ḥac. ⁶ Lau naŋ sêtoc bêc ḥatô sa kêlêc, naŋ sêkôm tu sêtoc Pômdau sa-ŋga. Ma lau naŋ seŋ wata, naŋ sem daŋge Anötö, dec seŋ gêŋ dau ma sêtoc Pômdau sa. Ma ḥac naŋ seŋ wata dom, naŋ sêkêŋ yao gêŋ dau tu sêtoc Pômdau sa-ŋga. Ma ḥac bocdinaŋ sem daŋge Anötö. ⁷ Bu yêc yac lau dakêŋ whin Yisu-ŋga ḥalôm, naŋ ḥamalac dan ti ḥadau dau tu in ndê têm mbo tali-ŋga, me tu ndê têm mbac ndu-ŋga dom. ⁸ Yac bu dambo tanli me dambac ndu, naŋ dambo tu dapo P ômdau ndê waê sa-ŋga. Yomandô. Yac bu dambo tanli me dambac ndu, naŋ dati Pômdau ndê lau.

⁹ Kilisi mbac ndu ma tisa mbo tali tiyham, tu bu ti lau batê si Pômdau, ma lau tali si Pômdau bocdinaŋ. ¹⁰ Ma bocdinaŋ tu sake-ŋga mac alic nem asidôwai sac, me apu ḥac tu yom ḥambwa-ŋambwa-ŋga? Yac tanyalê su bu yac hoṇ oc dalhac Anötö aŋgô-ŋga têŋ in ndê bêc êmatôc lau-ŋga. ¹¹ Tôm yom naŋ sêto yêc bocdec bu:

Pômdau sôm, “Tôm aö gambo tanli yomandô, dec aŋyalê pi ḥandô bu lau hoṇ oc sêpôŋ haduc têŋ aö, ma sêhoc si yom asê yêc Anötö aŋgô-ŋga.”

[Ais 45:23]

¹² Yom dau tôc asê tiawê bu yac tigen-tigen oc dalhac Anötö aŋgô-ŋga, bu dawhê dauŋ neŋ lêŋ sa têŋ in.

Mêtê atac whin-ŋga oc kôm asidôwa dan peŋ dom

¹³ Tu dinaŋ-ŋga dec danem dôhôŋ dauŋ neŋ lêŋ whin asidôwai si lêŋ tu dapu ḥac-ŋga dom. Ma dayob bu dakôm gêŋ dan, naŋ oc tôm bu lhac

asidôwa dañ ahuc e iñ so Anötö ndê lêj, nañ dom. ¹⁴ Aö gakêj whij Pômdau Yisu, dec whê aneñ gauc sa, ma kayalê tidôj bu gêj hoñ iñ ñayham yêc Anötö añgô-ñga. Magoc ñamalac dañ bu kêj whij bu gêj dañ iñ ñadômbwi yêc Anötö añgô-ñga ma kêj yao bu neñ dom, goc gêj dau ñadômbwi yêc ñamalac dau añgô-ñga. ¹⁵ Magoc mac bu aneñ gêj dañ nañ kôm nem asidôwa dañ ndê ñalôm ñawapac, dec mac atôc mêtê atac whij-ñga têj iñ dom. Ayob daôm bu mac nem lêj aneñ gêj-ñga kôm nem asidôwa nañ Kilisi mbac ndu tu iñ-ñga, nañ ndê kêj whij tisac dom. ¹⁶ Akôm gêj hoñ ti gauc, ma bocdinañ lau dañ oc sêtôm dom bu sêpu gêj nañ mac alic ñayham. ¹⁷ Lêj nañ dambo †Anötö ndê gôliñ ñapu, nañ ñahu hêganôj gêj daneñ ti danôm-ñga dom. Magoc dambo Anötö ndê gôliñ ñapu ñahu sip dasa lêj gitêj, ma dambo ti yom malô ma ti atac ñayham nañ Ñalau Dabuñ puñ dôj sip yac neñ ñalôm têjtêj. ¹⁸ Asa nañ bu nem akiñ Kilisi êjkuc lêj dinaj, nañ Anötö oc lic iñ ñayham, ma lau nom-ñga sêwhij oc sêmpij iñ.

¹⁹ Bocdinañ dasap lêj yom malô-ñga dôj, ma dakôm gêj hoñ tu dapuc asidôwai hoñ dôj ma dalhac ñaŋga. ²⁰ Akôm Anötö ndê gwelenj popoc tu yom pi gêj daneñ-ñga-ñga dom. Gêj hoñ iñ ñayham tu daneñ-ñga, magoc yac bu dakôm ñamalac dañ ndê kêj whij tisac tu gêj nañ tañ-ñga, dec dakôm giso. ²¹ Mac bu aneñ wata me anôm wain me akôm gêj ñatô nañ kôm nem asidôwa dañ ndê kêj whij tisac, nañ ñayham bu mac ahu gêj dau siñ yêc-ñga.

²² Yom bocke nañ am kêj whij pi gêj hoñ dinaj, nañ kôc dôj yêc amlu Anötö ñalhu. Asa nañ kôc

gauc ḥapep pi gēj hoj dinaŋ e kôm giso dom, naŋ oc tap Anötö ndê mwasin̄ sa. ²³ Magoc ḥamalac naŋ gēj gēj ma ḥalôm lu-lu pi gēj dau, naŋ kēkuc lēj kēj whiŋ-ŋga dom, ma oc tap Anötö ndê matōc sa. Lēj bocke naŋ am kēj whiŋ bu lēj solop yēc Anötö aŋgô-ŋga, naŋ kôm. Gēj bocke naŋ am kôm ti atac lu-lu, naŋ sac.

15

Dakôm gēj hoj tu danem asidôwai sa-ŋga

¹ Yac lau naŋ dakēj whiŋ ḥaŋga, naŋ dahôc ḥawapac dawhiŋ lau naŋ sêkēj whiŋ babalê, tu bu danem ḥac sa-ŋga dandic ḥawaē. Dakôm gēj tu dapo daun̄ sa-ŋga dom. ² Yac lau tigeŋ-tigeŋ dakôm mêtê ḥayham tēj lau meŋpan̄ yac-ŋga tu danem ḥac sa-ŋga, ma tu dapuc ḥac dōj-ŋga. ³ Gauc nem Kilisi. Inj kôm gēj dan̄ tu dau ndê atac whiŋ-ŋga dom, magoc kôm gēj hoj kēkuc Anötö ndê atac whiŋ. Ma tu dinaŋ-ŋga dec sêpu inj, tôm yom naŋ sêto yēc bocdec bu:

Lau naŋ sêpu am, naŋ sêpu aö bocdinaŋ. [BW
69:9]

⁴ Anötö ndê yom hoj naŋ sêto yēc muŋ su, naŋ Anötö kēj bu êndôhôŋ yac. Ma yom dau oc puc yac dōj bu dalhac ḥaŋga, ma êŋgilí yac bu dahu ḥandô ḥayham naŋ dakēj bataŋ dambo, naŋ sinj dom.

⁵ Anötö naŋ puc mac dōj ma kēgilí mac bu alhac ḥaŋga, naŋ piŋ mac hoj dōj tu aŋkuc Yisu Kilisi-ŋga. ⁶ Ma ḥalêj dinaŋ inj oc kēj mac ambo ti nem ḥalôm tigeŋ, ma awham pitigeŋ ma ahoc yac neŋ Pômdau Yisu Kilisi ndê Damba Anötö ndê waê asê.

*Nawaê ñayham gic lau Israel-ŋga ma lau apa hoj
ñawaê*

⁷ Bocdinañ akôc lau sêkêj whinj Yisu-ŋga hoj sa, tôm Kilisi dau kôc mac sa. Nälêj dinañ mac oc apo Anötö ndê waê sa. ⁸ Aö wasôm têj mac bu Kilisi meñ gitôm lau Israel-ŋga si ñgac akiñ, bu kôm yom nañ Anötö gic bata têj abanji Israel-ŋga, nañ ñandô sa. ⁹ Ma lau nañ lau Israel dom, nañ oc sêmpij Anötö tu iñ ndê mêtê tawalô lau-ŋga. Gitôm yom nañ sêto yêc bocdec bu:

Tu dinan-ŋga aö wampiñ am têj ndoc aö wambo wawhiñj lau gameñ apa-ŋga. Wanem wê tu watoc am nem ñaê sa-ŋga. [BW 18:49]

¹⁰ Ma yom dañ tiyham yêc bocdec bu:
Mac lau gameñ apa-ŋga, atac ñayham awhinj Anötö ndê lau Israel-ŋga. [Diut 32:43]

¹¹ Ma dañ tiyham:
Mac lau gameñ apa-ŋga hoj ampiñ Pômdau. Ma mac lau hoj anem wê atoc iñ sa-ŋga. [BW 117:1]

¹² Ma Aisaya to yom bocdec bu:
Nasili dañ oc puc pi meñ yêc Jessi ndê ñawakac.
Ma iñ oc tisa bu nem gôliñ lau nom-ŋga hoj.
Ma lau nañ lau Israel dom, nañ oc sêkêj bata bu iñ nem ñac si. [Ais 11:10]

¹³ Aö wateñ Anötö, nañ ti gêj ñayham hoj nañ yac dakêj batañ, nañ ñahu, bu kêj atac ñayham ti yom malô nem mac ahuc tu mac nem akêj whinj Yisu Kilisi-ŋga. Ma bocdinañ Nalau Dabuñ ndê ñaclai oc puc mac dôj bu alhac ti atac pa su, ma ahôj gêj ñandô ñayham nañ mac akêj batam ambo.

Pol ndê gweleñ ɻawaé ɻayham-ɻga

¹⁴ O aneñ asidôwai. Yêc aneñ ɻalôm aö gakêñ whinj ɻançga bu mac akôm mêtê ɻayham eñ, ma mac anyalê yom ɻandô tidôñ, e mac atôm bu andôhôñ têñ daôm. ¹⁵ Tu Anötö ndê mwasiñ nañ kêñ têñ aöñga, dec gato yom pi gêñ ɻatô ti ɻançga têñ mac, tu bu wawhê mac nem gauc sa, ma gauc nem yom dau tiyham. ¹⁶ Aêc. Anötö kêmwasinj aö, dec kêyalinj aö sa bu wanem akiñ Yisu Kilisi tôm dabuñsiga, bu wahoc Anötö ndê ɻawaé ɻayham asê têñ lau gameñ apa-ɻga. Ma tu aneñ gweleñ dindec-ɻga dec lau gameñ apa-ɻga nañ sêkêñ whinj Yisu, nañ oc sêti lau dabuñ ɻa Nalau Dabuñ ndê ɻaclai, ma ɻac oc sêtôm da nañ Anötö gêlic ɻayham.

¹⁷ Bocdinañ dec aneñ ɻahu gapo dauñ sa tu gweleñ nañ gakôm tu Anötö-ɻga, nañ Yisu Kilisi dau. ¹⁸ Aö gatec bu wasôm yom pi gêñ nañ aö dauñ gakôm, tigeñ wasôm yom pi gêñ hoñ nañ Kilisi dau kôm. Aö gahoc ɻawaé ɻayham asê têñ lau gameñ apa-ɻga, ma sêlic gêñ daësam nañ aö gakôm. Magoc Kilisi dau gêm ɻac si ɻalôm kwi e ɻac dañga wambu Anötö. ¹⁹ Iñ ndê Nalau Dabuñ kêñ ɻaclai têñ aö bu wakôm gêñ dalô ti gêñ atutu daësam. Bocdinañ aö gahoc ɻawaé ɻayham pi Kilisi asê timala eñ, yêc malac Jerusalem ma yêc gameñ hoñ e meñ têñ gameñ Ilirikum-ɻga. ²⁰ Aö gatec bu wakwê andu pi lhac alhô nañ ɻamalac dañ kêsuhuñ muñ su. Bocdinañ têñ ɻamata-ɻga e meñ, aö atac whinj bu wasôm ɻawaé ɻayham asê têñ lau nañ dañgasuñ sambuc Kilisi ndê ɻaê-ɻga. ²¹ Tôm yom dañ nañ sêto muñ su pi Kilisi bocdec bu:

Lau nañ sêñgô iñ ɻawaé dañ dom, nañ oc sêlic iñ.

Ma ñac naŋ sêŋgô yom pi inj su dom, naŋ oc
sêŋyalê inj. [Ais 52:15]

Pol gauc gêm bu ndic lau malac Rom-ŋga kësi

²² Tu gweleŋ dinaŋ hê aö dôŋ ŋapan-ŋga, dec gitôm dom bu watêŋ mac waloc. ²³ Yala daêsam gi su, aö ŋalôm kac aö bu walic mac. Ma kwahic dec aneŋ gweleŋ pacndê yêc gameŋ dindec. ²⁴ Bocdinan aö gauc gêm bu watêŋ gameŋ Spein-ŋga wandi, ma têŋ ndoc waŋsêlêŋ wandi, naŋ dec gauc gêm bu walic mac têŋ ndoc dinaŋ. Aö tac whiŋ ŋandô bu wambo wawhiŋ mac tôm bêc ŋatô, ma gakêŋ bataŋ bu tiŋambu mac oc anem aö sa bu watêŋ Spein wandi. ²⁵ Magoc gêŋ ŋamata-ŋga aö kwahic dec bu wapi Jerusalem wandi, bu wanem lau sêkêŋ whiŋ-ŋga sa yêc dindê. ²⁶ Bu lau gameŋ Masedonia ti Akaya-ŋga sêlic ŋayham bu sêndic awa sa bu sênen lau sêkêŋ whiŋ-ŋga naŋ sêpônda dau yêc malac Jerusalem, naŋ sa. ²⁷ Nac sêlic ŋayham bu sêkôm bocdinan, ma lêŋ dau inj solop. Nahu bu lau gameŋ apa-ŋga si tôp yêc lau Israel-ŋga. Nac sêtap mwasiŋ nem ñac si gatu sa-ŋga sa tu Kilisi-ŋga, naŋ men akêŋ lau Israel-ŋga si ton. Bocdinan solop bu ñac sêkêŋ si awa nom-ŋga ŋatô, bu sênen lau Israel-ŋga naŋ sêpônda dau, naŋ sa, ma sêô si tôp.

²⁸ Têŋ ndoc gweleŋ dindec pacndê su, ma wakêŋ awa dindec sip lau Jerusalem-ŋga amba su, naŋ goc watêŋ Spein wandi. Ma têŋ têm dinan wamen walic mac. ²⁹ Ma aö gakêŋ whiŋ bu têŋ ndoc waloc wambo wawhiŋ mac, naŋ Kilisi oc êmwasiŋ yac hoŋ êŋlêc.

³⁰ Tu yac neŋ Pômdau Yisu Kilisi-ŋga, ma tu mêtê atac whinj-ŋga naŋ Nalau kēj tēŋ yac, dec waten mac bu alhac awhinj aö, ma dahôc ŋawapac ŋawaé ŋayham-ŋga dawhinj daunj. Ma atenj mbec tēŋ Anötö tu aö-ŋga. ³¹ Atenj mbec bu Anötö êŋgaho aö su yêc lau gamej Judia-ŋga naŋ sêkêŋ whinj Yisu dom, naŋ amba. Ma atenj mbec bu gweleŋ naŋ gakôm bu wanem lau sêkêŋ whinj-ŋga sa yêc malac Jerusalem, naŋ oc sêkôc sa ti atac ŋayham. ³² Ma Anötö bu lic ŋayham, dec tiŋambu watêŋ mac waloc ti atac ŋayham, ma waŋwhaŋ daunj wawhinj mac e licwalô sa tiyham. ³³ Anötö Yom Malô Nadau whinj mac sambob. Yomandô.

16

Pol kēj acsalô tēŋ iŋ ndê silip naŋ sêmbo malac Rom

¹ Yac neŋ lhuŋwê kēj whinj Yisu-ŋga daŋ gêm akiŋ gôlôwac dabuŋ yêc malac Kenkria, naŋ ndê ŋaê Pibi. Aö bu wawhê iŋ sa têŋ mac bu iŋ awhê ŋayham. ² Iŋ gêm lau daësam sa, ma gêm aö sa whinj, ma bocdinaŋ dec wandac mac bu akôc iŋ sa tu Pômdau ndê ŋaê-ŋga, aŋkuc Anötö ndê lau dabuŋ si lêŋ solop. Ma anem iŋ sa tu gêŋ bocke naŋ pônda dau-ŋga.

³ Akêŋ aneŋ acsalô ŋayham têŋ Prisila lu Akwila, awhê lu ŋgac naŋ sêkôm gwelenj sem akiŋ Yisu Kilisi-ŋga sêmbo malac Rom, tôm aö gakôm gambo gamej dindec. ⁴ Muŋ-ŋga iŋlu sêkêŋ dau sambuc tu sênenm aö sa-ŋga, ma sêhêgo dau bu sêmbac ndu tu aö-ŋga dom. Tu dinaŋ-ŋga aö bu wanem danje iŋlu, ma gôlôwac dabuŋ hoŋ yêc lau apa si gamej, naŋ sem danje iŋlu sêwhinj. ⁵ Ma wandac mac bu

akēñ acsalô tēj lau sêkēñ whinj-ŋga hoj nañ sêkac dau sa bu sêlic om yêc iñlu si andu, nañ sêwhinj. Ma akēñ aneñ acsalô tēj Epenetus, aneñ ñamalac atac whinj-ŋga, nañ ti ñgac ñamata-ŋga bu kēj whinj Yisu yêc gameñ Esia-ŋga. ⁶ Asôm aneñ acsalô tēj Maria nañ kôm gweleñ atu tu nem mac sa-ŋga. ⁷ Ma akēñ acsalô tēj Andronikus lu Junias, nañ yac asa akēñ aban tigen, ma muñ-ŋga andöc gapoc-walô awhinj dauñ. Inlu awhê lu ñgac tiwaê yêc aposel si ton ñalôm. Ma iñlu sêkēñ whinj Kilisi sêmuñ aö.

⁸ Asôm acsalô tēj Ampliatus, ñgac kēj whinj Pômdau-ŋga nañ aö atac whinj kêlêc. ⁹ Ma asôm acsalô tēj Urbanus, nañ alu am akiñ Kilisi awhinj dauñ, ma tēj Stakis aneñ ñgac tac whinj-ŋga dan. ¹⁰ Ma tēj Apeles nañ hôc ñawapac daêsam tu Kilisi-ŋga, magoc kalhac ñaŋga ma hu ndê kēj whinj siñ dom. Ma akôm acsalô tēj lau hoj nañ sêmbo Aristobalus ndê andu, ¹¹ ma tēj Herodion, aneñ ñatô dan. Ma tēj lau nañ sêmbo Nasisus ndê andu, nañ sêkêñ whinj Pômdau. ¹² Ma akôm acsalô tēj Tripena lu Triposa, awhê lu nañ sem gweleñ ñaŋga tu Pômdau-ŋga. Ma tēj Pesis, awhê nañ aö atac whinj kêlêc, nañ kôm gweleñ ñaŋga tu Pômdau-ŋga whinj. ¹³ Akôm acsalô tēj Rupas nañ Pômdau kêyalin iñ sa, ma tēj iñ dinda nañ yob aö gitôm aneñ dinan̄ solop. ¹⁴ Ma asôm acsalô tēj Asiñkretus, Plegon, Hemes, Patrobas, Hemas ma asidôwai nañ sêmbo sêwhinj ñac. ¹⁵ Ma tēj Pilologus, Julia, Nereus lu lhuwê, ma Olimpas ti lau sêkêñ whinj-ŋga hoj nañ

sêmbo sêwhiŋ ɳac. ¹⁶ Akam daôm* aŋkuc Anötö ndê lau dabuŋ si lêŋ. Kilisi ndê gôlôwac dabuŋ ton tigeŋ-tigeŋ yêc gameŋ dindec, naŋ sêkêŋ si acsalô ɳayham têŋ mac sêwhiŋ.

Pol puc lau Rom-ɳga dôŋ bu sêlhac ɳaŋga

¹⁷ O asidôwai, aö wateŋ mac bu ayob daôm têŋ lau naŋ si mêtê kôm lau sêwhê dau kôc-kôc, ma sêšom yom naŋ so yom ɳandô naŋ mac akôc sa su, bu ɳac si yom dau kôm lau si sêkêŋ whiŋ tisac. Andic ahê lau kaiŋ dinaŋ. ¹⁸ Bu ɳac sem akiŋ yac neŋ Pômdau Kilisi dom, magoc sêkôm tu dau-ɳga. ɳac sêmbac-sêmbac yom lau, ma sêšom yom ɳayham-ɳayham bu sêŋsau lau gauc babalê, naŋ sêtôm dom bu sêŋyalê yom ɳahu.

¹⁹ Lau hoŋ sêŋgô ɳawaê bu mac daŋam wambu Kilisi ndê yom, ma bocdinaŋ aö atac ɳayham atu tu mac-ɳga. Magoc aö wanem la mac, bu ati lau ti gauc tu lêŋ ɳayham-ɳga, ma andic ahê mêtê sac hoŋ. ²⁰ Anötö Yom Malô ɳadau ɳasawa sauŋ oc ku Sadaŋ dulu, ma kêŋ inj sôc mac gahim ɳapu. Yac neŋ Pômdau Yisu ndê mwasiŋ têŋ mac.

Lau ɳatô sêkêŋ si acsalô têŋ lau Rom-ɳga

²¹ Timoti, naŋ kôm gweleŋ whiŋ aö, naŋ kêŋ ndê acsalô ɳayham têŋ mac. Ma Lusias, Jason ma Sosipata, lau naŋ yac asa yêc abuŋ tigeŋ, naŋ sêwhiŋ. ²² (Ma aö Tetius, naŋ gato Pol ndê yom sip bapia

* **16:16:** Yêc inj ndê bapia, Pol to yom ma sôm têŋ lau Rom-ɳga bu sêŋgutô dau ɳa lêŋ dabuŋ. Mêtê dau bu tôc asê bu ɳac hoŋ sêmbo ti ɳalôm tigeŋ ma atac whiŋ dau. Alic yom kaiŋ tigeŋ yêc bapia ɳatô - 1 Kor 16:20; 2 Kor 13:12; 1 Tes 5:26; ma 1 Pit 5:14. Mêtê dau kékuc lau Israel-ɳga si gêbôm, magoc lau Papua Niugini-ɳga si mêtê naŋ êlêmê sêkôm, naŋ sêkam dau.

dindec, naŋ wasôm acsalô têŋ mac tu Pômdau-ŋga.)
23 Ma Gaius, naŋ kôc aö Pol ti lau sêkêŋ whin-ŋga malac dindec-ŋga sa, ma kêŋ ndê andu ti yac mba gameŋ akac sa ambo-ŋga, naŋ kôm ndê acsalô têŋ mac whinj. Ma Erastas, ŋgac naŋ yob malac dindec si ganom mone-ŋga, lu yac mba asidôwa Kwatus, sêkôm si acsalô têŋ mac bocdinaŋ. [**24** Yac neŋ Pômdau Yisu Kilisi ndê mwasiŋ têŋ mac hoŋ. Yomandô.]

Pol teŋ mbec êmpij Anötö-ŋga

25 Tampiŋ Anötö dandic ŋawaê. Bu ŋawaê ŋayham naŋ aö gahoc asê, ma mêtê naŋ sem pi Yisu Kilisi, naŋ Anötö gitôm bu puŋ dôŋ yêc mac nem ŋjalôm e kôm mac akêŋ whinj ma alhac ŋaŋga. Anötö ndê lêŋ nem lau si-ŋga yêc siŋ dau ŋasawa balinj su.
26 Propet akwa sêto yom pi lêŋ dau muŋ su, ma kwahic dec Anötö naŋ mbo titêm-titêm, naŋ gic atu lau bu sêhoc yom dau asê tiawê, e lau nom-ŋga sambob sêkêŋ whinj, ma daŋga wambu inj. **27** Dahoc Anötö tigenj, gauc ti gauc Nahu, naŋ ndê waê sa tôm têm hoŋ, tu Yisu Kilisi-ŋga. Yomandô.

**Anötö ndê Yom Lé̃sêm Wakuc
The New Testament in the Bukawa language of Papua
New Guinea
Nupela Testamen long tokples Bukawa long Niugini**

copyright © 2000 Lutheran Bible Translators Australia

Language: Bukawa

Translation by: Lutheran Bible Translators Australia

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-13

PDF generated using Haiola and XeLaTeX on 11 Nov 2022 from source files
dated 9 Oct 2020

545e5ca3-1e95-59e4-8380-93951e023cf7